

Carlo Roberto Maria Redaelli

IL NÙL LUMINÔS

LETARE PASTORÂL 2020-2021

*«Il Signôr al marcjave devant di lôr,
vie pal dì intune colone di nûl,
par mostrâur la strade,
e vie par la gnot intune colone di fûc,
par fâur lusôr,
par che a podessin viazâ dì e gnot»*

(Esodi 13,21)

UNE LETARE PASTORÂL PAR UN TIMP DI INSTABILITÂT

1. Sul inviâsi dal mêsi di Març si sin cjatâts intun lamp ducj sierâts a cjase, spaurîts e blocâts, viti-mis di une pandemie no previodude. O vin sperât ch'al fos vêr il slogan di chei dîs – “*al larà dut ben*” – e si vin iludût che par Pasche, par Jugn, pal Istât, par Setembar, ... dut al ves fin e che si podès tornâ a la “normalitât” da la vite di prime. Ma dome tra la fin di Mai e il principi di Jugn al è stât pussibil vignî fûr dal isolament o *lockdown*, no però par tornâ daurman di dulà che si jere restâts, ma pitost par lâ indevant tal clime di instabilitât di un timp contrassegnât da la convivenza obleade cul virus, un timp che no savìn trop ch'al durarà.

Come dute la societât ancje la comunitât cristiane e je stade cjadade di sorprese e metude in dificol-tât dai events, si à cjatât impreparade, e à dovût fermâ dutis lis sôs ativitâts e iniziativis, ancje la celebrazion eucaristiche, e cu la fin dal *lockdown* e à vût a cefâ cuntune riprese no facile, malsigure e plene di incognitis.

2. Puedie vê sens une letare pastorâl in cheste situazione? Mal soi domandât e cun me ancje i miei colaboradôrs plui strets. La rispueste o stimi ch'è vedi di jessi affermative. Sigûr no je une letare pastorâl ch'è salve il mont e nancje une Glesie locâl..., ma al pues jessi util dâ a la comunitât diocesane motifs di discerniment, condividûts e di condividi, e cualchi orientament pal percors spirituâl in chest an pastorâl 2020-2021 cussì particolâr rispjet ai agns passâts. Sence pretese di origjinalitât o di esclusivitât: dentri da la Glesie e da la societât si assist vuê a un proliferâ di tescj, riflessions, documents, video, e v.i. ch'a tentin di proponi clâfs interpretativis di chel ch'ò sin daûr a vivi e di mostrâ cualchi troi di lâ daûr. Dut al pues jessi util, ma la nestre Glesie, tal so piçul, e à une sô origjinalitât e un so itinerari, che i spiete al vescul, cul jutori e il

**Une situazione
no previodude**

**Ise necessarie e
oportune une letare
pastorâl?**

sostegn di tancj, individuâ e proponi.

3. A proposit dal compit dal vescul, o pensi ch'al sedi just di bande mê confessâ cun scletece di vê sintudis veris par me, massime tai prins mê di cheste no facile esperience, lis peraulis dal profete Gjeremie: «*ancje il profete e il predi a van indavant e indaûr pal país sence capî plui nuie*» (Gjer 14,18). Un disorientament e une dificolât a capî e a decidi che, o riten, a vedin rivuardât – e ancjemò in cualchi maniere a rivuardin – ducj chei che te Glesie e te societât a àn un compit di vuide.

Ma il Spirtu Sant al è presint te nestre vite e te storie e il so jutori, se implorât cun fede, nol mancje mai. E a cui ch'al à responsabilitât te Glesie no i mancje mai il sostegn da la preiere, da la testimoniance, da la riflessione, da la presince e da la azion dal popul di Diu. Nol è par altri bessôl tal so compit specific: il vescul al fâs part dal coleç episcopâl e al condivît la sô responsabilitât cul pape (e ducj sa cetant che lis peraulis e, prime ancjemò, lis azions di pape Francesc a sedin stadis e a sedin determinantis in chest moment) e cui veslui, massime chei plui dongje. Ma alc di simil al vâl ancje pai plevans e pai predis, ch'a son part dal unic presbiteri diocesan, e par ducj chei ch'a àn une responsabilitât e un servizi te Glesie e ju condividin cun altris. La Glesie, a ducj i livei, e je par sô nature cjase e scuele di comunione, e e je caracterizade da la sinodalitât.

4. No mi tiri indaûr duncje nancje chest an dal proponi une letare pastorâl a la Glesie di Diu ch'è je a Guriza. Ancje se chest scrit al è stât let in stampon di plui personis, o riten util precisâ che la prime part, dedicate al discerniment da la situazion atuâl su la fonde da la Peraule di Diu, e je ch'è ch'è sint di plui i efets da la mê sensibilitât; invezit la part di orientaments e à fat bogns soledut i contribûts e i sugjeriments di cui ch'al è impegnât di plui inte pastorâl diocesane.

**Il disorientament
di cui ch'al à
autoritât**

**La responsabilitât
da la letare pastorâl**

DESERT, ESILI E TORNÂ DAL ESILI: DICERNI IL NESTRI TIMP SCOMENÇANT DA LA PERAULE DI DIU

5. A son diviersis manieris par fâ un discerniment metint a confront la Peraule di Diu cu la vite. A voltis si pues scomençâ cu la Peraule, chê par esempli proferide da la liturgjie dal dì (ancje dome la frase curte ripuartade sul sfueut dal Calendari da la Peraule), altris voltis si pues partî da la vite e cirî chel che inte Scritture al pues judâ a interpretâ la nestre vite. Cheste ricercje spes e je plui intuitive che sistematiche: e nas da la cognossince e da la familiaritât cu la Bibie e, nancje dîlu, da la disposizion a scoltâ tal cûr dal Spirtu Sant. Si pues rivâ a cjatâ une frase o a voltis une esperience, prova-de di une persone o dal popul di Diu, buine di iluminâ une situazion vivude vuê.

In chescj mês o sin daûr a vivi alc che nus tocje ducj tal nestri jessi adun come societât e come Glesie. Par chest al è stât spontani par me riferîmi plui che a une frase o a une esperience di un singul, a chel che il popul di Diu al à vivût. A nivel intuitif a mi mi pâr ch'a sedin trê lis esperiencis che a puedin someâi di plui a chel ch'ò vin sperimentât in chescj mês e ch'ò sin ancjemò daûr a vivi: il desert, l'esili e il tornâ dal esili.

6. Ogni esperience, se e je vere e no creade su la cjarte, e je uniche e iripetibil. Ancje chê ch'ò sin daûr a vivi e je cussì. In chest sens no podìn cjapâ une storie presentade da la Scritture e identificâsi daurman cun chê sence nissune sfumadure. Chest nol sarès par altri rispjetôs viers di nô, e, prime ancjemò, viers di cui che le à vivude une volte, oms e feminis in cuarp e anime e no atôrs di une sene. Però in cualchi maniere ricognossisi in chês personis, intivâ someancis tra la lôr storie e la nestre, viodi cemût che Diu al à operât cun lôr par capî cemût ch'al è daûr a operâ cun nô, dut chest al è pussibil e, o soi convint, di grant aiût. Covente

Une triple intuizion

**L'unicitât di ogni
esperience**

alore une leture simboliche e no testuâl di chel che la Scritture nus presente. E je chê ch'ò cirarai di presentâ tai paragrafs ch'a vegnin dopo.

1. Il desert: un timp di prove

7. Il pelegrinâ dal popul di Diu tal desert dopo la jessude dal Egjit al somee ch'al sedi une esperien- ce buine di fânus rifleti sui mê s plui brûts e dificii da la pandemie, caraterizâts dal isolament totâl, cuant che ducj o sin stâts cjapâts di pôris, preocu- pazioni, perplessitâts, crisis, domandis, dificolts, come se si cjatassin intun desert. Ma e esist une difference tra l'esperien- ce dai ebreus e la nestre. Il cjaminâ tal desert di bande dal popul di Israêl, in realtât, al jere la tape centrâl dal esodi dal Egjit, un event – chel dal esodi – di liberazion da la sclav- itût e di un viaç viers une tiere promesse.

Nô, invezit, no sin stâts liberâts, ma sclavizâts da la pandemie e o vin sperât no di lâ viers une gnove "tiere promesse", ma di tornâ se pussibil e prime pussibil a chê ch'e jere, ancje se cun tancj limits, une tiere promesse che la pandemie nus à fat cuasi dismenteâ, une tiere promesse che si clame "normalitât".

Ma biel lant dilunc dal desert, il popul di Israêl si veve dismenteât un pôc a la volte di jessi vignût fûr di une situazion di sclavitût e al veve ancje pierdût o cuasi la sperance di rivâ a une tiere pro- messe. Par chest, a dispriet da lis diferencis, il so pelegrinâ tal desert i somee tant a chel che nô o vin vivût in timp dal isolament.

8. Il desert al è stât prin di dut un timp di prove pal popul ma ancje pal Signôr, come se nol fos bon di salvâ chei ch'al veve fat vignî fûr dal Egjit. Im- puartant chel ch'al è contât tal cjap. 17 dal libri dal Esodi: «*Il popul al protestà cuintri di Mosè: "Danus aghe di bevi!". Mosè ur disè: "Parcè se cjapaiso cun me? Parcè sfidaiso il Signôr?". In chel lûc la int e pative la sêt par mancjance di aghe e e bruntulà*

Il desert, l'esodi e la tiere promesse

Il Signôr tirât a ciment

cuintri di Mosè: "Parcè mo nus âstu fat vignî fûr dal Egjit? Par fâ nus murî di sêt, nô, i nestrî fîs e il nestrî besteam?". Alore Mosè al berlà vîers dal Signôr e i disè: "Ce aio di fâ jo par cheste int? Nol va vie trop che mi coparan a clapadis!". Dissal il Signôr a Mosè: "Metiti devant dal popul e cjol cun te un pôcs di anzians di Israêl. Cjape in man il baston, chel che tu âs batût il Nîl, e va! Jo o sarai devant di te là, su la crete, sul Oreb. Tu batarâs un colp su la crete e l'aghe e spissularà fûr e la int e podarà distudâ la sêt". Mosè al fasè cussì sot i voi dai anzians di Israêl. I metè non a chel lûc Masse e Meribe, par vie da la proteste dai ebreus e parcè ch'a tirarin a ciment il Signôr disint: "Il Signôr isal da la nestre bande sì o no?"». (Esodi 17,2-7).

La domande fondamentâl e je propi cheste: «*Il Signôr isal da la nestre bande sì o no?*». E e je chê che tal cûr da la situazion di pandemie e je diventade: parcè il Signôr le aie permetude e nol met man par risolville? Une domande che si zonte a tantis altris che si corin daûr: parcè esistino lis calamitâts naturâls? parcè esistial il patiment? parcè esistino lis malatiis? parcè patissino i fruts? parcè la muart? Il Signôr al ven tirât a ciment da lis nestrîs domandis spes insistentis e dai nestrîs apeî sconsolâts. Ma Lui isal da la nestre bande sì o no?

Domandis autenticis, veris, parcè ch'a nassin di une esperience dolorose e reâl tant che mai. Ancje cui ch'al vîf in zonis ch'a son stadis cjapadis di mancûl da la pandemie, come la nestre, al à vût scoltât par television la filaine cuotidiane dai numars dai muarts, dai ricoverâts in terapie intensive, dai malâts in ospedâl, dai infetâts; o ai viodût cun fuarte comozion e pietât la serie cuasi infinide di cassis poiadis sul pavement di une glesie e la file di camions dal esercit ch'a puartavin lis cassis in lûcs lontans dai paîs di divignince da lis personis defontis. No si à podût no domandâsi il parcè e il sens di dut. E cui ch'al è crodint nol à podût fâ di mancûl di confrontâ la sô fede cu la esperience vivude e rivâ a voltis parfin a metile in discussion.

9. Parcè che no dome il Signôr, ma ancje nô, popul di Diu, o sin stâts tirâts a ciment, come il popul tal desert. Un popul ch'al à patît la fam, la sêt, il disorientament, rivant fin a ricuardâ cun nostalgjie la sclavitût dal Egjit (cfr. Numars 11,1-6) e a fâsi un Diu, come il vidiel di aur, ch'al fos tal mieç da la int no come il Signôr lontan e misteriôs (cfr. Esodi 32, 1-6). Di sigûr ancje in timp dal *lockdown* tancj di lôr – ancje crodints – a son lâts a cirî un "idul" dulà ingrampâsi in cualchi maniere.

**Il popul tirât
a ciment**

10. E pûr il Diu dal esodi al è stât cul so popul tal desert e i à dât une man tantis voltis. Ciert, a la sô maniere e no di sigûr daûr di ce che la int si spiete. Par esempi midiant da la mane. Un nudriment che al veve però carateristichis particolârs: al vignive dât ogni dì e dome par chel dì (no se la dì dopo e fos une sabide) e al doveve jessi zumât dome chel tant ch'al coventave (cfr. Esodi 16). Come a volê dî che il Signôr no nus fâs mancjà il pan cuotidian, ch'ò invochìn te preiere dal Pari nestri, ma nol ven incuintri di sigûr une volte par dutis – come che o volaressin – ai nestris dibisugns e desideris. «*Ogni dì a 'nd à avonde da la sô fadie*» (Mateu 6,34), al à afermât Gjesù, ma parcè che ogni singule dì e viôt operâ la providence di bande di Diu Pari, ch'al nudrì i uciei dal cîl e al vistìs la jerbe da la campagne, e al sa di ce che nô, siei fîs, o vin dibisugne (cfr. Mateu 6,25-34). Chel che Gjesù al à proferît nol è duncje une frase rassegnade come par dî: cjapiti cheste zornade e lis dificoltàs di cheste zornade e sopuartilis cun pazienze. Ogni dì a 'nd à avonde da la sô fadie parcè che ogni dì al à la sô gracie, ogni dì al à la sô providence.

**La rispueste dal
Signôr: la mane**

In chest timp di insigurece ch'ò sin daûr a vivi al è impuartant vê cheste fede di rinovâ dì par dì, sence spietâsi chê soluzion definitive che o volaressin: "vuê" Diu Pari si preoche di nô e lu fasarà ancje doman ch'al sarà un gnûf vuê. Sence dismenteâ che il don dal Pari plui che no la mane al è il Fi, come ch'al aferme Gjesù tal Vanzeli di Zuan, cun rife-

riment a la esperience dal desert: «*In veretât, in veretât jo us dîs: nol è stât Mosè a dâus il pan dal cîl, ma al è il Pari gno che us da il pan dal cîl,chel vêr. Di fat il pan di Diu al è chel ch'al ven jù dal cîl e i da la vite al mont*» (Zuan 6,32-33).

11. Dilunc la strade dal desert il Signôr nol garantîs dome aghe e mangjâ, ma al acompagne il popul cu la sô presince rapresentade da la colone di nûl e di fûc: «*Il Signôr al marcjave devant di lôr, vie pal di intune colone di nûl, par mostrâur la strade, e vie par la gnot intune colone di fûc, par fâur lusôr, par che a podessin lâ indevant di e gnot. No i è mai mancjade al popul la viste da la colone di nûl vie pal di e nancje la colone di fûc vie par la gnot*» (Esodi 13, 21-22; cfr. Esodi 40, 34-38).

Un altri segnâl di presince e jere la tende da la cunvigne, dulà che «*il Signôr al fevelave cun Mosè dret in muse, come che un al fevele cul so amì*» (Esodi 32,11). No un templi, salt e sigûr, ma une tende, ch'è palesave cu la sô provisorietât l'adatâsi di Diu a la peregrinazion dal popul tal desert. E al è significatîf che tal preambul di Zuan si torni propi su la imajin da la tende afermant a la letare che «*il Logos si fasè cjar e al metè la sô tende framieç di nô*» (Zuan 1,14). Gjesù, il Logos fat cjar, nus acompagne tal nestri pelegrinaç teren, dulà ch'ò sperimentin ogni moment la nestre fragjilitât (no vin ca la nestre cja-se definitive, ma dome une tende...) e no nus bandone mai, par nissune reson.

12. Cuâl isal il sens da la prove che il popul dal esodi al à vivût tal desert? Un pas dal discors di Mosè tal libri dal Deuteronomi lu spieghe: «*Visiti di dute la strade che il Signôr, to Diu, ti à fat fâ par cuarante agns tal desert, par umiliâti, par metiti a la prove e cognossi fin in fonts il to cûr: vaessistu metût in pratiche i siei comants o no? Lui duncje ti à umiliât, ti à fat patî la fam, po ti à dât di mangjâ la mane, che ni tu ni i tiei vons no le vevis mai cognossude, par fâti capî che l'om nol vîf dome di*

La colone di nûl e di fûc e la tende da la cunvigne

Il parcè da la prove

pan, ma che l'om al vîf di dut ce ch'al ven fûr da la bocje dal Signôr. La monture che tu vevis intor no si è mai fruiade e il to pît no si è mai sglonfât in chescj cuarante agns. Ricognòs alore tal to cûr che il Signôr, to Diu, ti corezeve come che un pari al corêç il so frut» (Deuteronomi 8,2-5).

“Par cognossi fin in fonts il to cûr”: la prove e palese la veretât di noaltris stes, e fâs vignî a flôr lis nestris fragjilitâts, no par fânus pierdi la olse, ma pitost parcè che finalmentri o podìn fidâsi dal Signôr, di Cui che no nus fâs mancjâ il so sostegn e nus fâs cressi in maniere di rivâ a cognossi chel ch'ô sin nô, Lui e il so amôr.

Mosè al continue tal so discors metint in vuardie il popul su la tentazion, une volte superât il timp da la prove, di dismenteâ il Signôr: *«Puar mai te se tu ti dismentearâs dal Signôr, to Diu, butant in bande i siei comants, lis sôs usancis e lis sôs leçs che vuê ti ordeni. Cuant che tu varâs mangjât e che tu ti sarâs saceât, cuant che tu varâs fatis sù bielis cjasis che tu larâs a stâ, cuant che tu varâs viodût multiplicâsi il to besteam minût e grant, a vê bon-dance di aur e di arint e a slargjâsi dute la tô robe, il to cûr che no si alci masse par chel. In chês volte no sta dismenteâti dal Signôr, to Diu, che ti à fat vignî fûr da la tiere di Egjit, da la cundizion di sclavitût; che ti à menât par chest desert grant e tement, tiere di sarpints velenôs, di sgarptions e di arsetât; ch'al à fat spissulâ par te l'aghe da la crete plui dure; che tal desert ti à dât di mangjâ la manne, che i tiei vons nancje no savevin ce ch'è jere, par umiliâti, par provâti, par che il to avignî al sedi fortunât» (Deuteronomi 8,11-16).* Co il Signôr nus varà consintût di superâ la prove da la pandemie e nus donarà un timp di normalitât e di serenitât, puars mai nô se si dismentearìn di Lui e di cetant che nus à stât dongje in chescj mêis dificii.

2. L'esili: experience da la pierdite

13. Une seconde experience dure vivude dal popul

**La distruzion
di Gjerusalem
e l'esili**

di Israêl e je stade l'esili a Babilonie dopo da la distruzion di Gjerusalem e da la fin dal ream di Gjude. Un'esperience che, insiemi cun chê dal desert, nus pues judâ a interpretâ il timp dal sclopâ improvîs da la pandemie cui mês dal isolament.

La citât di Gjerusalem e vignî assediade e concuistade dal re di Babilonie, Nabucodonosor, une prime volte tal 597 p.d.C. Par chest, al aferme il secont libri dai Rês, cjav. 24, Nabucodonosor «*al depuartà dute Gjerusalem, o sei ducj i comandants, ducj i combatents, ven a stâi dîs mil depuartâts, ducj i marangons e i faris; e restà dome la biade int da la tiere. Al depuartà a Babilonie Joiakìn; al menà in esili di Gjerusalem a Babilonie ancje la mari dal re, lis feminis dal re, i siei cjastrâts e i nobii dal paîs. E ancjemò ducj i oms facoltôs, siet mil di lôr, i marangons e i faris, mil di lôr, e ducj i oms in stât di puartâ armis, il re di Babilonie ju menà in esili a Babilonie*» (2Re 24,14-16). Une seconde deportazion si verificà dopo da la distruzion di Gjerusalem tal 587-586 p.d.C. simpri par colpe dai babilonês voidâts di Nabucodonosor, intervignût une seconde volte dopo di une ribelion: «*Nabuzaradàn, sores-tant da lis vuaitis, al menà vie il rest dal popul che al jere restât in citât, i disertôrs che si jerin butâts cul re di Babilonie e cui ch'al restave. Il sores-tant da lis vuaitis al lassà un pôcs dai puars da la tiere par viodi dai vignâi e da la campagne*» (2Re 25, 11-12).

14. O podìn intuî cetant ch'è sedi stade traumatiche pal popul di Israêl, ancje da un pont di viste da la fede, la distruzion di Gjerusalem, e prin di dut dal so templi, se si fâs riferiment a tantis pagjinis dai profetis e dai salms. Une pierdite totâl di chel ch'al costituive il popul di Diu: la tiere e in chê il templi. Un corot ch'al dovè jessi frontât intune situazion no facile e gnove come chê dal esili. Une situazion ch'è fo frontade in tantis manieris come che nus ven testimoniat da la Sacre Scriture. Al jere cui che si iludeve ch'è fos une experience cur-

Vivi l'esili

te; cui, invezit, come il profete Gjeremie te sô letare ai prins depuartâts, al invidade a no fâsi ilusions e a no "fermâ" la vite in spiete di un rimpatri immediât, ma pitost a vivile ad in plen in cheste gnove situazion e tal stes timp mantignî la sperance di tornâ: *"Il Signôr da lis schiriis, Diu di Israêl, ur dîs cussì a ducj i esui che di Gjerusalem ju ai fats depuartâ a Babilonie: Fasêt sù cjasis e lait a stâ dentri, plantait orts e mangjait i lôr prodots; sposaitsi e gjenerait fîs e fiis; cjolêt feminis pai vuestris fîs e maridait lis vuestris fiis, par ch'a gjeneredin fîs e fiis cussì di rivâ a multiplicâsi e a no calâ. Cirît la pâs dal paîs là che us ai fats depuartâ e preait il Signôr par chel, parcè che cul so ben us vignarà ben ancje a voaltris. Di fat il Signôr da lis schiriis, Diu di Israêl, al dîs cussì: Che no us imbroin i profetis ch'a son framieç di voaltris e i vuestris induvins e no stait a lâ daûr dai siums ch'a fasin lôr, parcè che chei li a profetin falsetâts tal gno non: jo no ju ai mandâts. Sentence dal Signôr! Di fat il Signôr al dîs cussì: Dome cuant ch'a saran scjadûts setante agns par Babilonie o vignarai a cjatâus e o puatarai insom par voaltris lis buinis peraulis tornant a menâus in chest lûc. Jo o cognòs benon i progjets ch'ò soi daûr a inmaneâ sul vuestri cont – sentence dal Signôr –, progjets di pâs e no di disgraciis, par dâus un avignî plen di sperance. Mi invocarês, o cjaminarês daûr di me e jo us scoltarai. Mi cirarês e mi cjararês, parcè che mi cirarês cun dut il cûr. Mi fasarai cjatâ di voaltris. Sentence dal Signôr. O cambiarai in miôr il vuestri destin e us menarai dongje i depuartâts e us metarai adun di dutis lis gjernaziis e di ducj i lûcs là che us ai dispierdûts. Sentence dal Signôr. Us fasarai tornâ tal lûc d'indulà che us ai fat menâ vie» (Gjeremie 29,4-14).*

15. La pandemie no à distrut la nestre societât, ma di sigûr, come tantis voltis si à dit in chescj mêis, *"nuie nol sarâ plui come prime"*. Dome in futûr però o savarìn ce ch'al sarâ pierdût par simpri, ce che

Il nestri "esili"

al restarà e ce ch'al sarà di gnûf. In ogni câs il moment dal *lockdown* al è stât par nô come un timp di esili. In cualchi maniere o vin sperimentât ancje nô lis stessis dificolts e insiguresis: il traume pal bloc improvîs di dut e par lis consequencis da la pandemie cun tancj malâts e muarts, il desideri e l'ilusion che dut al finîs in pôc timp, l'impegn di vivi in ogni câs se pussibil dentri da la gnove situazion. Ancje lis comunitâts cristianis a àn vivût dut chest, fermant di colp tantis ativitâts, spietant fiduciosis che dut al passàs in pôc timp, cirint di reagjî e di mantignî in vite chel ch'al è fundamentâl: la preiere, la scolte da la Peraule, la vicinace cul Signôr ancje sence ricevi i sacraments, lis relacions tra lis personis, la catechesi, l'atenzion ai puars, e v.i.

No son mancjadis nancje tensions o in ogni câs ponts di viste diferents. Semplificant e estremizant lis posizions (che in realtât a jerin spes plui sfumadis), al jere cui che, ancje a cost di oponisi a ciertis disposizions di sigurece sanitarie, al voleve istès mantignî il plui pussibil la vite da la comunitât come ch'e jere prime, massime cun riferiment ai sacraments, e cui che, invece, al viodeve tal bloc da lis variis ativitâts il vignî a flôr finalmentri di une comunitât cristiane basade sul essenziâl e dedit al "cult spirituâl".

Bisugnarà rifleti su chel che nus è capitât e su cemût che lu vin vivût, sperant che par lis comunitâts e par ognidun il timp dal isolament al vedi quartât in ogni câs a «*cirî il Signôr cun dut il cûr*» come afermât dal profete Gjeremie e a discerni chel ch'al conte.

16. In plui da la gramece e dal grant dolôr (al baste lei il libri da lis Lamentazions), il timp dal esili la Scritture lu presente ancje cun peraulis di grande sperance tai tescj dai profetis e tai salms. Tant che esempi si puedin citâ doi pas, un di Ezechiel e un di Isaie. Ezechiel, di une famee sacerdotâl, al jere stât mandât in esili cul prin grup dai depuartâts: lis sôs peraulis a dimostrin che ancje in tiere foreste

Peraulis di sperance

no va al mancul la profezie. La sentence ripuartade ca e à chê di rispuindi al trat di presunzion e di un ciert dispresi viers i prins esiliâts di bande di chei che al timp da la prime deportazion a jerin restâts a Gjerusalem e si iludevin di jessi al sigûr e in pês: *«Alore mi rivà la peraule dal Signôr: "Fi dal om, tal dîs a ti e ai tiei fradis, ai tiei fradis depuartâts cun te e a dute la cjase di Israêl, che la int e va disint sul lôr cont: Vô lait pûr lontan dal Signôr; nô la tiere le paronin par dirit di ereditât. Juste par chel disiur: il Signôr, gno Diu, al dîs cussì: Se ju ai mandâts lontan in tieris forestis, se ju ai sparniçâts pal mont, tai lûcs là ch'a son lâts o sarai par lôr par un trat di timp un santuari. Par chel disiur: il Signôr, gno Diu, al dîs cussì: Us regonari framieç dai forescj e us tirarai dongje di dutis lis tieris là ch'ò sês stâts sparniçâts e us darai la tiere di Israêl. Li a rivaran e a gjavaran ducj i idui schifôs e dutis lis porcariis. Ur darai un altri cûr e ur metarai dentri un spirt gnûf; o tirarai vie il cûr di clap dal lôr cuarp e ur darai un cûr di cjar, di mût ch'a ledin daûr dai miei comandaments e ch'a rispitedin lis mêis leçs e lis metedin in vore: a saran il gno popul e jo il lôr Diu. Rivuart a chei altris, invece, il lôr cûr al va daûr dai lôr idui schifôs e da lis lôr porcariis, ma o fasarai plombâ sul lôr cjâf la lôr condote". Sentence dal Signôr Diu»* (Ezechiel 11,14-21). Biele tant che mai la promesse dal Signôr a cui ch'al è restât sence templi: *«O sarai par lôr par un trat di timp un santuari»*. Il Signôr nol bandone cui che si cjate in esili, anzit i garantîs no dome il tornâ, ma ancje la pussibilitât di une vere conversion indicade da la imagjin dal cûr gnûf e dal spirt gnûf.

Peraulis di grande sperance ancje chês di Isaie: *Gjubilait, cîi; gjolt, tiere, berlait di gjonde, monts, parcè che il Signôr al confuarte il so popul e al à dûl dai siei ch'a patissin. Sion al à dit: "Il Signôr mi à bandonade, il Signôr mi à dismenteade". Puedie une femine dismenteâsi dal so frut, finî di vê dûl dal fi da lis sôs vissaris? Ancje se lôr si dismenteassin, jo invece no ti dismentearai par mai. Ve, ti*

ai disegnade sul dret da lis mês mans, lis tôs muris lis ai simpri devant dai voi. Chei ch'a tornin a fâ sù a spessein, chei che ti sdrumin e ti fischin si 'nt van. Alce i tiei voi dulintor e cjale: ducj si dan dongje, a vegnin ca di te. "Come che jo o vîf – sentence dal Signôr –, chei li a son ducj tant che un furniment che tu ti metis intor, lôr ti furnissaran parie tant che une nuvice". Parcè che lis tôs ruvinis, lis tôs desolazions, la tô tiere fiscade a saran cumò masse piçulis par dute la int, biel che chei che ti àn glotude si slontanaran. A tornaran a dîti tes oreli i fîs, che tu jeris restade cence: "A 'nd è masse pocje place par me, fasimi puest, par ch'ò puedi sistemâmi". Alore tu tu disarâs intal to cûr: "Cui ju aial gjenerâts chei ca? Jo o jeri sence fruts e sterpe, esiliade e presonire, e chei ca cui ju aial tirâts sù? Ve, o jeri restade bessole, e chei ca indulà jerino?". Il Signôr Diu al dîs cussì: "Ve, o alçarai la mê man viers dai foescj, e o alçarai la mê bandiere viers dai popui. A tornaran a puartâ i tiei fîs tal braç, lis tôs fiis a saran puartadis su lis spalîs. I rês a saran i tiei paris e lis lôr principessis lis tôs braçulis. Devant di te si butaran cu la muse par tiere e a bussaran il pulvin dai tiei pîts; in chê volte tu savarâs che jo o soi il Signôr e che no restaran malapaiâts chei ch'a sperin in me". (Isaie, 49,13-23). Ancje se la citât e je distrute, lis sôs muris a restin simpri disegnadis sul dret da lis mans dal Signôr. Lui no si dismentee mai di nô e nus da simpri la fuarce par partî une altre volte. Nol delût la nestre sperance.

3. Il tornâ e la difficile ricostruzion

17. Il ream dai babilonês nol durà a lunc. Lôr a forin batûts dai persians, ch'a cambiarin politiche tai confronts da lis nazions sometudis. A lassarin, in fat, che ogni popul al tornàs tal so teritori a condizion ch'al fos mantignût l'impegn di fedeltât al sovrân. Si presentà cussì ancje pai ebreus depuartâts la pussibilitât di tornâ dal esili e su la fonde dal edit

**Gaudie e vai
tal tornâ dal esili**

mandât fûr di Ciro tal 538 p.d.C. ur fo permetût di tornâ in patrie. Cheste oportunitât, ch'è someave realizâ infin lis promessis dai profetis, no podeve che puartâ a une esplosion di gaudie. Il salm 126 a 'nd è une testimoniance biele tant che mai:

*Cuant che il Signôr al ristabilì il destin di Sion,
nus pareve di insumiâsi.*

*In chê volte o vevin ducj bocje di ridi,
e la nestre lenghe e cjantave di gjonde.*

In chê volte tra i foescj si diseve:

"Il Signôr al à fat par lôr robononis!"

*Il Signôr al à fat par nô robononis:
cetant contents ch'ò jerin!*

*Torne a meti in sest il nestri destin, Signôr,
come i riui che tal Negheb a scorin.*

*Cui che vaînt al semene,
al seselarà plen di gjonde.*

*Biel lant al vai,
puartant la semence di butâ,
ma tal tornâ al è dut legri,
puartant i siei balçûi.*

Nol mancjà però il ricuart dai patiments passâts e la gjonde si messedà cul vai come ch'al conte il libri di Esdre riferintsi a la prime fase di ricostruzion dal templi: «*Cuant che i muradôrs a butavin lis fondis dal templi dal Signôr, a jerin li ancje i sacerdots cui lôr paraments e cu lis trombis e i levits, fîs di Asaf, cui cimblis par laudâ il Signôr cui cjants di David, re di Israêl. A cjantavin, laudant e ringraçant il Signôr, ripetint: "Parcè ch'al è bon, parcè che il so boncûr al è par simpri cun Israêl". Dut il popul al berlave plui ch'al podeve laudant il Signôr parcè ch'a jerin stadis butadis lis fondis dal templi dal Signôr. Ma une vore di sacerdots e di levits e di sorestants di cjasade in etât, ch'a vevin viodût il templi di prime, a vaîvin fuart intant che si butavin lis fondis di chest templi; la pluritât invezit e berlave e e scriulave di gjonde. Cussì no si rivave a discerni il berli da la aclamazion dal berli di dolôr da la int, parcè ch'al jere dut un vosarili e il sunsûr si sintivilu fin lontan» (Esdre 3,10-13).*

18. La fin dal esili, però, no le a pâr cuntune situa-
zion di pâs, di gjonde e di prosperitât. Prin di dut
no ducj i esiliâts a tornarin indaûr: tancj di lôr si
vevin rifat une vite a Babilonie e no vevin nissune
voie di butâsi intune aventure plene di incognitis,
tornant intun teritori par la plui part bandonât e
plen di ruvinis. Cui ch'al tornà, po, al dovè frontâ la
fadie da la ricostruzion cun pocjis risorsis e sore-
dut l'oposizion di cui ch'al jere restât o ch'al jere
vignût a stâ a Gjerusalem e tai dintors (depuartât
ancje lui dai babilonês di altris teritoris concuis-
tâts). La ricostruzion e lave duncje indevant a bu-
gadis, a voltis ancje par colpe dal sovrân ch'al dave
masse abade a lis protestis dai nemîs di chei ch'a
jerin tornâts dal esili («*Alore la int dal lûc si metè a
gjavâi il spirt al popul dai Gjudeus e a lambicâur la
vite par no ch'a fasessin sù. In plui a stiçarin cuin-
tri di lôr un pôcs di intendents, par fâ lâ in strucj il
lôr progjet. Chest vie par ducj i dîs di Ciro, re di
Persie, fin al ream di Dario, re di Persie*» (Esdre 4,
4-5). Il libri di Esdre al conten une ample relazion
di dutis chestis dificultâts (un libri da la Bibie pôc
cognossût, ma ch'al podarès jessi util leilu in chest
nestri timp di riprese malsigure). No mancjarin po
lis tentazions di "dâsi dongje" e di parâ vie cui che
nol apartignive al grup dai esiliâts "pûrs", gjavant
cui che nol voleve repudiâ la femine no ebree (cfr.
Esdre 9-10).

E fo però ancje une riprese dal pont di viste reli-
gjôs, sedi cul tornâ a dâ vite al cult, sedi cun cele-
brazions ch'a interpretavin in maniere gnove il pa-
ssât par lâ a finî intune domande corade di pardon
(cfr. Neemie 8-9).

19. Ancje se cui limits e lis fadiis metudis ca in evi-
dence, il tornâ dal esili al palese in ogni câs la con-
tinitât da la storie da la salvece, sedi di bande di
Diu, ch'al à continuât a viodi dal so popul e a con-
fuartâlu cu la vôs dai profetis, sedi di bande dal
popul, ch'al à rispuindût a la azion di Diu e al à ris-
tabilît la aleance stipulade tal desert.

Dopo dal esili si à vût ancje un timp favorevul par la formazion dai libris biblics: chei plui antîcs a son rivâts a la redazion finâl; altris, in particolâr i sapienziâi, a son stâts scrits par la prime volte.

In ogni câs, la fede di Israêl si mantignì in grazie soredut di chei ch'a verin il cûr di tornâ e di tornâ a fâ sù. E par merit po da lis gjenerazions dopo, che pûr sot da lis diviersis dominazions forestis, no pierderin mai la fede di viodi diventâ vere la promesse da la ricostruzion dal ream di David par opare dal Messie spietât.

20. La situazion ch'ò sin daûr a vivi, e che a voli e crôs o vivarìn tai mêis ch'a vignaran, e cjate di sigûr cualchi someance cu la esperience dal tornâ dal esili. Ancje nô o volaressin che dut al tornàs a la normalitât, a cemût ch'ò jerin prime e miôr di prime. Invezit o dovìn fâ i conts cun insiguresis, inciertecis, pas indevant e pas indaûr. Parfin cui ch'al à la dificile responsabilitât di voidâ la societât nol rive simpri a dâ indicazioni univochis e a direzi lis fuarcis bande un percors concret di riprese e alc di simil, o dovìn ricognossi, al capite ancje a nivel eclesiâl. Ma chest al è il nestri timp e o dovìn vivilu fin in font sperant tal aiût dal Signôr e tal confuart dal so Spirt e metint dut il nestri impegn tal cirî stradis pussibilis. In continuitât cun cui che al è rivât prin di nô su la strade da la fede e sintint ancjemò plui fuerte che no tal passât la nestre responsabilitât viers lis gjenerazions ch'a vignaran.

**La nestre
riprese**

UNE LETURE GNOVE "SAPIENZIÂL"

21. Par ognidun di nô e par ogni comunitât al è impuartant dedicâ timp, riflession e confront su chel ch'ò vin vivût e chel ch'ò sin daûr a vivi, tacant da lis ideis impiadis da la Peraule di Diu, in particolâr da lis esperiencis dal desert, dal esili e dal tornâ. Si à, però, di cjapâ in considerazion ancje il passaç storic ch'è je daûr a vivi la Glesie e il mont, une epoche che pape Francesc al à plui voltis definît no come "epoche di cambiament", ma come "cambi di epoche". Un passaç che la pandemie e à probabilmentri dome sveltît.

No si pues che jessi dacuardi cun lui, constatant, prime ancjemò ch'è sclopàs la pandemie, il progressîf lâ al mancûl dai ecuilbris internazionâi (cun dute la inciertece e la pericolositât da la ricercje di gnûfs rapuarts tra lis nazions), la impotence in cressite da lis istituzions sorenazionâls, il sprolungjâsi da la crisi economiche, lis vueris infinidis (come in Sirie), il difondisi dal terrorisim, lis migrazions dai popui, il degrât ambientâl, la cuistion dal clime,... E par chel che nus rivuarde, lis dificultâts da l'Europe, la crisi demografiche, la mancjance di determinazion da la rapresentance politiche, lis dificultâts da l'economie, e v.i. Ancje i svilups positîfs da la science e da la tecnologjie no son sence incognitis e domandis griviis massime dal pont di viste etc.

Il cambi di epoche al tocje ancje la Glesie, no dome parcè ch'è je tal mont, ma ancje par lis sôs vicenda internis. Ancje tal sisteme eclesiâl e je in pîts une modifiche dai ecuilbris mondiâi cu la crisi evidente da lis Glesiis occidentâls e il florî positîf, ancje se no sence dificultâts, di chês di chei altris continents. In Europe e in particolâr in Italie, l'inizi dal gnûf mileni al à dât l'impression di no rispuindi a lis sperancis che la spiete dal an doi mil e veve fat nassi: la scjarsetât drammatiche di vocazions cu la fin di esperiencis e ativitâts, il lâ al mancûl dal inflûs sociâl e culturâl da la fede, la diminuzion dai batiâts, lis dificultâts da lis iniziativis di rinovament

**Esaminâ il passât
tal contest di un
"cambi di epoche"**

nassudis tai ultins decenis, la fadie a meti in vore il consei Vatican II e lis intuizions palesadis in plui documents e orientaments pastorâi di cincuante agns incà, e v.i. – dome par citâ cualchi element dal cuadri contemporani ancjemò prime da la pandemie di Covid-19 – a spieghin l'inciertece da la propueste pastorâl e ancje une cierte strache da lis comunitâts. Logjic che no bisugne dismenteâ i elements positîfs come, par esempi, la testimoniance fuarte da la caritât, la impuartance dade a la Peraule di Diu, la costance tal impegn educatîf, la dedizion di predis, diacuns e fedêi, e v.i.

22. Une prime propueste che ur sugjeris a lis comunitâts parochiâls, ai grups, ai moviments e a lis associazions e je chê di cjatâ modalitâts concretis par realizâ chest discerniment. Par esempi, domandant ai components da lis diviersis realtâts di descrivi la vite in timp dal *lockdown* e chê che si è daûr a vivi cumò tal timp malsigûr da la riprese: esperiencis, ativitâts, pôris, sperancis, e v.i. confrontadis cu la Peraule di Diu e lis esperiencis dal popul di Diu presentadis parsore. Ben si intint sence dismenteâ di incuadrâ dut dentri da la crisi epocâl di vuê. E di condividi po chestis riflessions dentri di ogni grup o comunitât par rivâ ancje a formulâ une preiere comune.

Un impegn particolâr i spiete su cheste linie al consei pastorâl parochiâl o da l'unitât pastorâl, par la sô responsabilitât di interpretâ, cul plevan, i predis e i diacuns, la storie da la proprie comunitât. Ma nissun grup eclesiâl nol dêf svuincâ chest compit.

Al sarès impuartant che la stesse robe, cun modalitâts semplicis ma autenticis, e vignîs realizade ancje in famee: al sarès tra l'altri une maniere par valorizâ chest sogjet ch'al è stât cussì determinant tal timp dal *lockdown*.

No dovarès, in fin, mancjâ ancje di bande di ogni-dun une leture rinovade di ogni sô esperience di vite, sclete e autentiche, che nus judi a vê plui cussience di nô stes e dal nestri jessi tal mont vuê.

**Une propueste
di discerniment**

23. In cheste leture rinovade al sarà impuartant meti in lûs i aspiets problematic e chei positîfs e di sperance di chel ch'ò vin vivût e o vivìn e, plui in gjenerâl, a sperimentin vuê la Glesie e la societât. Prin di dut un ringraziament al Signôr che nus à confuartât in chescj mê. Un ringraziament che ur va ancje a ducj chei da la comunitât ch'a àn mantignût il lôr impegn e a àn savût frontâ lis gnovis dificultâts cun gjenerositât, creativitât e capacitât di coinvolziment. O pensi ai tancj predis e diacuns ch'a àn savût mantignî unide la proprie comunitât, a àn sigurât vicinace e atenzion a lis personis, massime a chês plui in dificultât e a àn ufiert une propueste spirituâl liturgjiche, catechetice e di preiere. Ma si à di ringraziâ ancje i catechiscj e lis catechistis e i educadôrs ch'a àn cirût di mantignî i contats cui zovins e lis lôr fameis e di ufrî sussidis par no interrompi il percors catehetic. No si dêf dismenteâ po i operadôrs da la Caritas ch'a àn continuât a pensâ pai puars e pai gnûfs bisugnôs. Al è un dovê ricuardâ cun ricognossince l'impegn di religjosis e di religjôs te azion pastorâl e caritative. Ancje diviersis fameis a àn savût cjatâ un lôr gnûf protagonisim per chel ch'al rivuarde la preiere e la catechesi e in ogni câs tantis personis si àn dât di fâ a pro di chei altris. Dutis chestis personis a son stadis fundamentâls par la vite da la comunitât cristiane e par chê da la societât stesse e a van ringraziadis, adun, ben si intint, cui miedis, i operadôrs sanitaris, lis fuarcis dal ordin, i voluntaris da lis diviersis Realtâts... ch'a àn dât timp e energjie par frontâ la pandemie e stâ dongje dai malâts e da lis lôr fameis.

**Une leture rinovade
ch'e puarte a ringraziâ**

24. Nol dêf però mancjâ un confront sui temis ch'a son vignûts fûr in chest timp: il sens da la vite e da la muart, la fragjilitât e la provisorietât ch'a caracterizin la storie umane, la dignitât da lis personis, la malatie, la fraternitât e la solidarietât, e v.i. Un confront ch'al dêf jessi "sapienziâl". No covente jessi ducj filosofis, pensadôrs, inteletuâi, leterâts o

**Un confront
"sapienziâl"**

artiscj - ancje se al è sensât savê fâ tesaur dai lôr contribûts -, ma covente jessi ducj "savints". Savint al è cui che no si contente di vivi e di lassâ passâ il timp, ma si interoghe, al scrutine, al sa cjatâ spazis di cidinôr e di riflession e al cîr chel ch'al è fundamentâl. Il cristian al vîf chest impegn, ch'al è prin di dut "uman", savint che par chest e je decisive la visuâl ch'e ven da la fede. Une fede che prin di jessi il crodi in cualchi veretât e je un rapuart vîf e reâl cun Gjesù. Lui nus sigure che no sin in chest mont par câs, ma parcè che il Pari nus vûl ben, il nestri ben. Nus à amât a tâl pont di consegnâ nus so Fi, il Fi ch'al à dât la sô vite par nô su la crôs. Il Fi ch'al è resurît e al à vinçût par simpri la muart e nus da la pussibilitât di vivi a nestre volte la sô Pasche par jessi cun Lui par simpri. Il Fi che nus à insegnât che la veretât da la vite e je l'amôr, un amôr ch'ò podìn vivi ancje nô in ogni moment in grazie dal don dal Spirtu Sant.

25. No mi displasarès che i tescj che in maniere semplice a varessin chê di palesâ la leture sapienziâl di chel ch'ò sin daûr a vivi – preparâts a nivel parochiâl, di grup, di famee o ancje di singui – a vignissin condividûts pûr a nivel diocesan. Si pues mandâju a la direzion di pueste eletroniche segnade ca: memoriacovid@arcidiocesi.gorizia.it
O domandarès in particolâr che i conseis pastorâi parochiâi o di unitât pastorâl a dedicassin, cu la dovude preparazion, un incuintri par la riflession sapienziâl ca sugjeride. E vignarà prontade dal Centri pastorâl une schede par prudelâ chest impegn, ch'al varès di jessi metût in vore dentri da la fin di Novembar.

**Un confront
condividût**

26. Al è impuartant però cjatâ manieris acetabilis par confrontâsi su chescj temis ancje cun personis che no partecipin a la vite da la comunitât cristiane, sence fâ câs al lôr nivel di fede (simpri difcil di giudicâ). Un esempi a son i "*Dialoghi di Corte Sant' Ilario*", organizâts da la diocesi di Guriza tal mês

**Un confront ch'al
partis dal uman
par une
colaborazion vere**

di Setembar: un resonâ a plui vôs sui temis da la fragjilitât, dal futûr e dal confin.

Il confront al fâs stât su la idee che l'apartignince al gjenar uman nus unìs in fradilance e che ogni femine e ogni om di buine volontât al è une persone a la ricercje di un significât dal vivi. Il dialic al presupon un "prejudizi positîf" in merit a chê altre persone, a la sô onestât, a l'autenticitât dal so cirî e al so desideri di contribuî al ben comun. Intune situazion di crisi come chê atuâl, un percors di scole e di confront vêr al pues puartâ a convinziions condividudis, a un insiorament vicendevul e a butâ lis fondis par un agjî comun a disposizion di chei altris.

27. Il cristian al è cussient di vê vût in don une grande ricjece, chê da la fede. Nol pues tignîlu plattât o a sô esclusive disposizion, massine co al pues diventâ une lûs ch'è ilumine une situazion difficile. Ma al è pussibil proponilu a chei altris dome a cualchi cundizion. La prime, ch'è pues someâ fûr dal vade, e je che la nestre fede e sedi vere. In concret se Gjesù al è pardabon il tesaur da la nestre vite. Se nol è par nô – ciert cun ducj i nestris limits e pecjâts – cemût podino proponilu a chei altris? Une seconde cundizion e je la capacitât di jentrâ in relacion, rispjetose e autentiche, cun chei altris. L'anunzi cristian nol pues lassâ in bande la relacion. Impuartant po al è chel che no mi strachi di ripeti: la necessitât in ogni ambient e duncje in dutis lis nestris relations no di fâ biele mostre da la nestre fede, ma di "*no scuindi di jessi cristians*". Un no scuindi ch'al impegne ancje a une coerence di vite, parcè che lis personis a osservin tant di plui di chel ch'al somee i cristians e si spietin une corrispondence tra chel ch'a crodin e chel ch'a vivin. Al è po decisîf vivi la fede tal concret dal dì di vuê, fasant tesaur da lis oportunitâts che nus vegnin dadis ma prime ancjemò sence schivâ lis domandis ch'a cruziin feminis e oms in chest moment. Infin al è fundamentâl jessi vierts a la vuide dal Spirtu Sant

**La propueste
di fede**

e a lis ocasions di testimoniance che nus met su la nestre strade.

28. A titul di esempi o volarès presentâ in sintesi un percors ch'al pues jessi a pro dal vierzisi a la fede e ch'ò ai sperimentât in cualchi dialic cun diviersis personis. O scomençarès di trê realtâts umanis che ancje la pandemie e à fat vignî a flôr.

Prin di dut la vite. O sin fats par la vite e no par la muart. Ducj o volìn vivi e o bramìn che ancje chei che nô ur volin ben a vivedin. E o volìn vivi par simpri e no dome fin a un ciert pont, ancje se o sperimentìn la fragjilitât da la nestre cundizion umane, il patiment e la muart. Dutis realtâts chestis ca che i presentin interrogatîfs pesants al nestri existi, e pûr no rivin a distruzi dentri di nô il desideri ferbint a la vite.

Un secont element al è la felicitât o, se si vûl, la afermazion di se. Nô o sin fats par jessi felîçs, par afermâsi, par sintîsi sodisfats. E o volaressin une afermazion definitive, ancje se, pûr in chest câs, o sintìn la provisorietât dal nestri content e dai moments di felicitât e, plui ancjemò, o sperimentìn spes sconfitis, faliments, disasis e angossis, intune peraule il nestri limit.

Un'altre carateristiche fundamentâl da la vite umane e je l'amôr. Ducj a àn dibisugne di jessi amâts e ducj a vuelin amâ. O sin fats par amâ. Ogni amôr uman, se autentic, al volarès jessi par simpri e ancje coinvolzi ad in plen la persone. Jo no pues dî a cui che i vuei ben, "ti vuei ben dome par un pôc di timp", "ti vuei ben dome cuntune part di me stes". Chestis esigjencis nativis tal amôr a vegnin a flôr ancje tai faliments: un amôr ch'al finìs al è calcolât apont un faliment parcè ch'al doveva durâ par simpri; un'esperience di amôr ch'è finìs e ven spes giudicade come se no fos mai esistude: "in realtât no ti ai amât mai", come se si fos convints dentri che chel che nol dure nol è amôr.

Il messaç cristian al dîs che se e je dentri di nô la brame inalienabil a la vite, a la felicitât, al amôr al

**Un pussibil percors
viers la fede**

è parcè che Cualchidun nus e à metude e al è bon di fâle diventâ vere. Il Signôr da la vite nus à creâts par la vite. Gjesù, muart e resurît, nus clame a partecipâ a la sô vite par simpri. E e je une vite di content e di felicitât par simpri, parcè che Lui nus salve dai nestrîs pecjâts e dai nestrîs faliments. Chest parcè che nus vûl ben di simpri e par simpri e nus à creâts, Lui l'Amôr, sul so stamp, someants a Diu, bogns di amâ. E l'Amôr al è vite e felicitât. Chest messaç puedial jessi acolt? Di sigûr la fede e je un don, ma un don ch'al compuarte la ricercje di sens ch'al è il fundament da la nestre umanitât. E chest al pues jessi spiegât e testemoneât dal cristian. Po i pensarà il Spirt a dâsi da fâ tal cûr da lis personis, spes di là di chel ch'ò podìn constatâ. A nô nus tocje testemoneâ e anunziâ il Vanzeli, la buine gnove cun fede e sperance.

UNE COMUNITÂT CRISTIANE VIVE TAL TIMP DA LA PANDEMIE

29. L'esperience dolorose e dificile dal *lockdown* e à costret lis comunitâts cristianis colpe la limitazion di timps, risorsis, relazions a interrogâsi su chel che al è fundamentâl par jessi comunitât secont il Vanzeli. Cualchi an indaûr lis nestrîs comunitâts, cu la letara pastorâl "*Cui ch'è je la Glesie*", a jerin stadis clamadis a riesaminâsi a la lûs da la esperience da la Glesie dai apuestui, presentade tai Ats dai Apuestui e tai tescj dal Gnûf Testament, e a cjatâ in chê esperience chel ch'al è decisîf par jessi comunitât cristiane. Lu vevin fat, in particolâr, scrivint i propriis "Ats da la comunitât". I mêis dal isolament a àn in cualchi maniere costret lis comunitâts a rivodijû par metijû in vore a nivel di essenzialitât e ancje di flessibilitât. La domande alore e je stade: cemût jessi comunitât cristiane, ch'è je convocate da la Peraule, e nas e e je nudride dai sacraments, e vîf la liturgjie, si interesse dal anuzi e da la catechesi, si impegne te caritât, si articole in diviers ministeris, e v.i., tal timp da la pandemie e dal isolament? In reatât alore nol jere stât timp par riorganizâsi e tantis nestrîs comunitâts a àn reagjît cuasi d'îstint sence pensâi masse. Cumò però al è il moment par une considerazion plui serene: ce isal essenziâl e decisîf par jessi comunitât cristiane al dì di vuê? Cemût vivilu cu la juste flessibilitât in chest timp là ch'a condurin limitazions e inciertecis? E cemût tal pragmatisim e continuitât dal nestrî percors?

**Jessi Glesie dai
apuestui ancje intun
timp di pandemie**

30. Si pues rispuindi a chestis domandis in maniere corete e vevule se si capîs ben il concet di "essenziâl". Prin di dut covente dit che "essenziâl" nol coincît cun "indispensabil". Si pues par esempi domandâsi: l'Eucaristie ise essenziâl o no par une comunitât cristiane? La rispueste e varès di jessi ovie: sigûr, anzit la Glesie e nas e e je nudride da l'Eucaristie. Ma ise ancje indispensabile? Intant dal

L'essenziâl

lockdown no si podeve celebrâ l'Eucaristie e cualchidun al à podût concludi che no fos indispensabile e duncje nancje essenziâl. E di sigûr il Signôr al è cun nô ancje se no si pues celebrâ l'Eucaristie. La eucaristie stesse, ve, no je une realtât ultime: tal Ream di Diu no saran plui ni Eucaristie ni chei altris sacraments, ma nus vignarà donade la comunione imediade cun Diu. Ma in chest timp, ch'al è chel dal pelegrinaç dal popul di Diu te storie e no ancjemò dal compliment dal Ream, l'Eucaristie e je essenziâl par la comunitât cristiane. No podêle celebrâ al cree un vueit, un patiment ancje se il Signôr al è in ogni câs e nol abandone la sô Glesie e dute l'umanitât: a pene pussibil l'Eucaristie e va celebrade. Consideracions compagnis a puedin jessi fatis par chei altris elements essenziâi da la Glesie (la Pe-raule, la preiere, la catechesi, la caritât, e v.i.): la esperience dal *lockdown* e à cun dute probabilitât dimostrât che no son indispensabilis o, se no altri, che no son indispensabilis lis formis solitis metudis in vore par vivi chescj elements. Ma chest nol vûl dí che no sedin essenziâi.

Une seconde considerazion impuartante e je chê di no identificâ ipso facto l'essenziâl cul "minimâl". E nol è dit ve che pontâ al essenziâl al puartedi la comunitât cristiane e ridusi par fuarce lis sôs iniziativis e ativitâts. Par esempi, dâ valôr al essenziâl da la caritât al pues sburtâ al contrari a aumentâ lis iniziativis a pro dai puars e dai bisugnôs, viodude la situazion di crisi lade in piês colpe da la pandemie, e a coinvolzi in chest cjamp plui personis e risorsis.

31. Covente duncje privilegjât l'essenziâl capît in maniere corete. Ma covente ancje vivût cun elasticitât e capacitât di adatement a lis circostancis. Se l'esistence no si lasse simpri sierâ tai nestris schemis e une buine azion pastorâl e je dome chê ch'e acompagne il disglagnâsi da la vite, cul adatâsi a lis personis, a l'evoluzion dai tims, a lis circostancis (indulà savê lei i segnâi da la vuide dal Spirt),

La capacitât di adatement

tant e plui dut chest al è domandât intun timp straordenari dominât da la inciertece come chel che nus ven domandât di vivi chest an.

Dut chest al pues jessi fadiôs e impegnatîf e al pues fâ nassi il sconfuart o, piês, la tentazion di sospindi dut e di fâ il mancul pussibil. Ma al pues ancje sburtâ lis nestris comunitâts a vê plui inventive, a provâ percors gnûfs, a esplorâ stradis no cognossudis, a coinvolzi gnûfs colaboradôrs – prin di dut i zovins – juste come ch’a àn fat tantis comunitâts tal timp dal isolament. Un risultât prezios di chest timp al podarès jessi in futûr une pastorâl no ripetitive e no ovie. Dal rest il vin gnûf dal Vanzeli al dêf restâ simpri vivarôs e al domande simpri ghirbis gnovis.

32. Une frase sintude spes e ripetude in chescj mês e je *“nuie nol sarà come prime”*. E pues jessi une affermazion sensade, parcè che in ogni cês la pandemie e lassarà consequencis ch’a duraran a lunc e che in cualchi maniere a cambiaran le nestre vite, o sperìn no dutis negativis. Ma no sin al an zero. E chest al vâl ancje par la comunitât cristiane, ch’è vîf une continuitât da la sô storie. Covente alore pontâ sul essenziâl e vê capacitât di adament, di rinovament, ma continuant dilunc la strade dal pont là che si cjatîsi, cirint di dâi valôr a ce ch’al è di positîf e di prometent e di superâ se al è pussibil vueits e difiets.

**Un cjaminâ
te continuitât**

33. Dut chel ch’al è stât afermât fin ca a rivuart da la comunitât cristiane tal so insiemi al vâl par ogni sô espression, ma al è decisîf ancje par la famee e pal singul crodint. Ancje in famee covente scuviert – scomençant di chel che si à rivât a vivi in timp *dal lockdown* – chel ch’al è essenziâl e savêlu vivi in continuitât cul propri lâ dilunc, ma cu la adattabilitât che i vûl.

**Ancje in famee
e a nivel personâl**

Chel istès al vâl a nivel personâl: ce isal essenziâl a fin che o resti cristian vuê dî, massime in chest timp no facil? Cuâl isal l’itinerari spirituâl che mi à

fat rivâ fin ca e ce isal daûr a domandâmi vuê il Signôr, ancje come "conversion" e cambiament?

34. Un segnâl di continuitât ch'ò volarès dâ sicu vescu tai mêis ch'a vignaran al è chel di tornâ a fâ la visite pastorâl. Une visite cun impostazion missionarie, prontade tal an pastorâl 2018-2019, instradade cui incuintris di ducj i conseis pastorâi in chel an e vivude intune prime plene atuazion intune unitât pastorâl tal an pastorâl passât.

Lis limitazions di caratar sanitari e di sigurece a podaressin jessi viodudis no tant che ostacui, ma tant che ocasion par meti in evidence il caratar di quotidianitât, di condivision da la vite di ogni dì di une parochie o di une unitât pastorâl. Altris espressions tradizionâls e plui solenis da la visite pastorâl a podaran jessi recuperadis dopo, daûr da la volontât dal Signôr.

**Tornâ a fâ
la visite pastorâl**

VIVI VUÊ COME GLESIE DAI APUESTUI

35. Come che si à ricuardât parsore, il riferiment decisîf e essenziâl par la comunitât cristiane in ogni epoche al è dât da la Glesie dai apuestui, che la esperience e je descrite tai Ats dai Apuestui e tai libris dal Gnûf Testament. La Glesie da lis origjinis e je di fat paradigmatiche par ogni esperience di comunitât cristiane: a chê bisugne tornâ massime intun timp di crisi e di cambiament, interpretant in maniere gnove i elements essenziâi di ogni realtât eclesiâl.

Par judâ cheste leture a nivel parochiâl e di unitât pastorâl, o sugjeris che i conseis pastorâi, inte seconde part dal an (cu la riprese di Zenâr), a dedichedin timp e riflession par une gnove edizion dai "Ats da la comunitât" (ancje tornant a pensâju in maniere unitarie a nivel di unitât pastorâl), scomençant di cuant ch'al vignarà dit daspò par ogni dimension carateristiche da la Glesie e ch'è mostri i piçui pas concrets che ogni parochie o unitât pastorâl e je daûr a fâ o ch'è pues cirî cun realisim di fâ tai mês ch'a vegnin. Un sussidi prontât dal Centri pastorâl al podarà jessi util par chest impegn, come ancje i incuintris di formazion pai components dai conseis pastorâi che si riferissaran a la catechesi, a la liturgjie, a la caritât. I tescj dai "Ats da la comunitât" rinovâts a podaran jessi mandâts dentri di Pasche 2021 a cheste direzion di pueste elettroniche: atticomunità@arcidiocesi.gorizia.it

**Tornâ ai "Ats
da la comunitât"**

1. Il primât da la Peraule

36. Di cualchi an incà la nestre diocesi si à impegnât tant sul teme da la Peraule. Ancje tal an pastorâl passât, la letare pastorâl, intitulade "*Il libri cjatât*", e à ufiert motîfs di riflession e sugjerît iniziativis a riuart da la Peraule di Diu, che si à cirût di meti in vore a dispiet da la improvise interuzion di Març. A chest proposit o vuei pandi preseament a chei Grups da la Peraule ch'a àn continuât a cja-

Il libri cjatât

tâsi ancje a distance, doprant i mieçs da la comunicazion sociâl.

Il preseament i va ancje a dutis lis iniziativis spontanii che i àn dât valôr a la Peraule: i sfueuts parochiâi, i video su la Peraule da la domenie (chel presentât sul sît diocesan – “Vivere la parola” – ch’al viôt il coinvolziment di diviers laics e altris publicâts di tancj predis e parochiis), il scambi di tescj tra i diviers grups di personis par mieç dai *social*, e v.i.

37. Al merte un encomi particolâr cui che, intimpât e no partignint di sigûr a la gjenerazion dai “natîfs digjitâi”, si à istès sfuarçât di imparâ a doprâ almancul in maniere elementâr i diviers struments e a metiju al servizi da la testimoniance dal Vanzeli e da la vite da lis comunitâts. Al è ancjemò tant di imparâ: no je la stesse robe inmaneâ une videoconferenze o trasmeti vie *streaming* la celebrazion di une Messe, gjestî un grup di catechesi a muse o in modalitât a distance, tignî une conferenze suntun teme religjôs o presentâlu intun video curt. Bisugne vê une formazion specifiche che ancje la diocesi e cirarà di promovî: ducj chescj mieçs gnûfs a son pardabon aromai indispensabii ancje in tims “normâi”, difûr da la fase dal isolament e da la pandemie.

L’ûs dai *social*

38. Bisugne lâ indevant tal percors di cognossince e di aprofondiment da la Peraule di Diu cuntune atenzion dople. Prin di dut ch’è di imparâ simpri di plui a fâ discerniment scomençant da la Peraule di Diu. La prime part di cheste letare e presente une propueste di discerniment da la situazion di vuê a la lûs da la esperience dal desert, dal esili e dal tornâ. Al pues jessi un model util: cirî inte Scritture peraulis e esperiencis, comunitariis e/o personâls, ch’a puedin iluminâ chel ch’o sin daûr a vivi. Altris voltis si pues partî no da la vite ma da la Peraule che nus ven ufierte, par esempi da la liturgjie, e di cheste cjatâ fûr criteris par interpretâ la esperience

Une atenzion dople

passade. In ogni câs bisugne prin di dut metisi a scoltâ cun atenzion la Peraule di Diu, cul jutori dal Spirtu Sant, evitant di cjapâ di cheste domechel che nus conven par nestriz emozions e considerazions. Come ricuardât plui voltis, bisugne ancje evitâ di lâ a finî subit su consequencis pratichis di stamp moralistic: la Peraule prin di dut e palese cui ch'al è Diu e cui ch'o sin nô tal concret da la nestre vite. Dome a la lûs di cheste rivelazion si pues capî ce sieltis fâ.

La seconde atenzion e je chê di condividi simpri di plui la esperience di scoltâ la Peraule di Diu evitant di sierâsi tal propri grup e jessi brâfs di invidâ altris a scuvierzi il tesaur da la Peraule di Diu.

39. A dispiet da lis limitazions di cumò al è impuartant ch'al continui il percors dai Grups da la Peraule, cul jutori ufiert a nivel diocesan e cu lis atenzions motivadis parsore.

Altre iniziative impuartante a pro da la cognossince da la Sacre Scriture e je chê dal "Calendari da la Peraule", prontât ancje chest an cul coinvolziment di tantis personis ch'a fasin part di diviersis agregazions laicâls e Grups da la Peraule. Za la preparazion di chest sussidi e je un'esperience fuarte di scolte da la Peraule. Chest an po al è stât domandât in particolâr di daûr risonance cu lis leturis dal dì a tescj di leterâts, poetis, filosofis, artiscj, e v.i., ancje di laics e di no crodints, cu la convinzion che il Spirt al fevele dapardut, parfin dulà che no imagjinìn, e che la Peraule e à in se une profonde consonance cun dut chel che di vêr e di autentic al esist tal uman.

40. Doprant chescj e altris struments – internet al è plen di tescj, video, imagjinis, e v.i. ancje di bon nivel – al è impuartant che ogni cristian al cjati la maniere di nudrîsi da la Peraule di Diu, miôr se ogni dì. Ancje dome lei la frase stampade sul Calendari da la Peraule e ricuardâle dilunc la zornade, magari cul fâle diventâ invocazion, al è un mût di

**Grups da la Peraule
e il Calendari
da la Peraule**

**Un fâsi dongje
personâl e familiâr
a la Sacre Sciture**

mantignî la comunion cul Signôr. O torni po suntun consei dât ancje in altris letaris pastorâls: lei in maniere continue un Vanzeli (si pues fâ ancje dut daurman), come se al fos la prime volte ch'ò scoltin/leìn chês peraulis, e lassâsi vuidâ di semplicis domandis: cui isal chest Gjesù che si fevele? ce disial di Diu? e di me e da la mê vite?

Se po il Signôr nus done la gracie di vivi intune famee dulà che si condivît chê stesse fede,alore e je possibile ancje une leture comune di un toc dal Vanzeli. Cualchi famee lu à fat intant dal *lockdown*, intun moment di preiere in sostituzion da la Messe da la domenie. Si pues però continuâ ancje quant ch'al è pussibil partecipâ a la celebrazion eucaristiche, magari in preparazion o in continuitât cun chê: un toc dal Vanzeli za scoltât e preât al risune in maniere diverse tal cûr quant ch'al ven let intant di Messe; un toc scoltât di gnûf, magari la domenie di sere, i dâ gnûf vivôr a la Peraule acolte in timp da la celebrazion eucaristiche.

41. Bisugne vê grande fede te Peraule di Diu che la Sacre Scritture nus presente. Une fede reâl, che no fâs stât sui miracui. Nô o volaressin ch'è fos par la nestre vite un fâr potent ch'al illumine la gnot tant che la lûs dal soreli, invezit e je pal plui dome "*ferâl pai nestris pas e lum sul nestri troi*" (cfr. salm 118, 105). Ma in fin dai conts nus baste ch'al illumini il nestri lâ dilunc, no impuarte se chest al capite di gnot e se o sin platâts dal scûr. Se il ferâl al illumine un pas dopo di chel altri, no nus fâs inçopedâ, no nus fâs pierdi il troi,alore al è chel che par cumò nus baste. E dulà che il troi al finìs e sarà la lûs da l'albe.

**Ferâl pai
nestris pas**

2. La catechesi e l'iniziazion cristiane

42. L'anunzi da la Peraule si fâs catechesi, destinate in particolâr a chei ch'a devin jessi iniziâts a la plenece da la vite cristiane. Il timp dal isolament al à viodût in diversis comu-

**Aleance tra famee
e comunitât**

nitâts parochiâls un coinvolziment plui grant da lis fameis. In cualchi misure e je stade restituide a lis fameis la "deleghe" par l'educazion cristiane dai fîs dade a la parochie e, in particolâr, a lis catechistis e catechiscj e ai animadôrs. Cumò al è clâr che la catechesi no pues jessi dome une responsabilitât da la famee, ma e je ancje compit fundamentâl da la comunitât cristiane. Bisugne però cjatâ un ecuilibri e une aleance tra famee e comunitât. Parcè no fâ tesaur da la esperience dai mês dal *lockdown* e la necessitât in chest timp di riprese di dovê operâ par piçui grups, par proponi une gnove colaborazion tra fameis e parochie? Par altri i piçui grups a domandaressin in tantis parochiis plui catechistis e catechiscj no simpri facil di cjatâ: coinvolzi e responsabilizâ lis fameis al podarès judâ a superâ cheste dificolât. Al sarà impuartant tentâ cualchi vie gnove e favorî un scambi di esperiencis tra lis parochiis, cu la regjie e daûr lis indicazioni dal ufici catechistic diocesan.

43. L'aleance tra fameis e parochiis e à di scomençâ fin dal Batisim. Nol è plui pussibil preparâ la celebrazion di chest sacrament cun cualchi incuintri, celebrâlu e po dî a lis fameis "a riviodisi" a quant ch'è scomence la catechesi pai fruts ch'a frequentin la scuele elementâr. Cheste prassi e je di fat un "abandon" da lis fameis che, ancje se a à decidût di batiâ il frut – sielte in dì di vuê no plui ovie... -, no son plui bogns par la plui part di garantî un minim di educazion cristiane al fi. Bisugne alore za in timp da la preparazion al Batisim cjatâ la maniere di cognossi miôr il sens da la domande dal sacrament presentade dai gjenitôrs ancje tant che ocasion par une riscuvierte dal lôr jessi cristians. A dovaressin jessi judâts a discerni che la decision di batiâ il fi e compuarte almancul l'intuizion che la fede, il riferiment a Diu, a son alc di impuartant di ufrî al propri frut.

Dopo dal Batisim bisugne vê modalitâts semplicis ma concretis par mantignî i contats tra famee e co-

Fin dal Batisim

munitât: un scambi di mail in ocasion di fiestis e inovâi (l'inovâl dal Batisim, chel co si fâs i agns), l'invît a vê part a un pâr di celebrazions pensadis par lôr vie par l'an, la ufierte di piçui sussidis par vivi la fede cul propri frut, e v.i.

44. Inte nestre diocesi, ancje se spes no si rive a savê vonde ben, a scomencin a jessi zovins e adults ch'a domandin di diventâ cristians. Al è ancje ogni an un bon numar di zovins e di adults che invezit a domandin il completament da l'iniziazion cristiane cul sacrament da la Cresime. Ancje a lôr ur va indreçade la catechesi cu la forme plui oportune, a nivel diocesan e cul coinvolziment da lis comunitâts che si aparten. In tancj câs in realtât e mancje la apartignince: no son personis ch'a frecuentin la comunitât cristiane che nancje no lis cognòs. La domande di diventâ cristians o di completâ l'itinerari di iniziazion e dovarès però cjatâ te comunitât, scomençant dai predis, un ategjament di acet cordiâl e di acompagnament rispjetôs. Za in timp da la preparazion al Batisim o da la catechesi, ma plui ancjemò une volte celebrâts i sacraments da l'iniziazion o da la Cresime, chescj zovins e adults a dovaressin "sintîsi a cjase" inte comunitât, cognossûts, acolts e valorizâts.

**L'iniziazion
dai adults**

45. Si fâs riferiment ogni moment in chestis pagjinis a la comunitât e a lis sôs responsabilitâts. Ma ancje in chest câs e esist di timp une "deleghe" che la comunitât e à dât ai predis (e diacuns) e ai catechiscj. Di sigûr la lôr funzion e je fundamentâl, ma no in prospetive di une suplençe da la comunitât. Par une comunitât cristiane "normâl" (pûr cun ducj i siei limits) al dovarès jessi naturâl acetâ cun plasê e concrete amistât cui ch'al devente cristian o al complete l'itinerari di iniziazion e cjatâ cun facilitât personis che si metedin dongje cun discrezion e empatie a cui ch'al e daûr a preparâsi pal Batisim o dispuestis a acompagnâ (magari come santul o santule) cui che al ricêf il sacrament da la Cresime

**Une comunitât
cussiente
da lis sôs
responsabilitâts**

di adult. Se une comunitât no da interès, timp, rissorsis e preieris par cui ch'al devente cristian, cemût puedie proclamâsi comunitât cristiane?

46. La comunitât cristiane che si augurisi un so interessament plui grant viers di cui ch'al devente cristian o al complete la sô iniziacion no je une entitât astrate, ma e je fate di personis concretis: chei ch'a colaborin in parochie in diviersis manieris, ma ancje la comunitât che si da dongje la domenie par l'Eucaristie. A son comunitât cristiane ancje parincj, cognossints, convicins, compagns di lavôr, e v.i. Chestis personis a son spes decisivis par la testimoniance cristiane. Un piçul esempi. Vuê di diviers gjenitôrs no batiin plui i fîs. Si trate tantis voltis no di une siele atente, magari motivade come agns indaûr da la volontât di lassâ libars i fîs di decidi co a saran grancj sence vêju "condizionâts" cul Batisim ricevût co a jerin piçui, ma dome di un no pensâi. Cetant ch'e pues jessi decisive in chest câs une famee cristiane, convicine e ch'e sedi in relazion cui gjenitôrs (ch'a sedin sposâts o convivents ca nol impuarte...), ch'e sa cjatâ l'ocasion par fivelâur cun simplicitât dal Batisim, ancje cul proponisi, in câs di disponibilitât, di fâ di intermediarie tra lôr e il plevan o cui ch'al è incaricât di acompagnâ la preparacion al Batisim. Robe impussibile? Dificilissime? In realtât se si è convints che la fede e je un tesaur, se si à une minime capacitât di relazion e si lassisi voidâ dal Spirtu Sant, la robe e je tant plui facile dal previodût e e colme il cûr di gjonde.

Un bon "vicinât" cristian

3. L'Eucaristie, la liturgjie e la preiere

47. La mancjance da la celebrazion da l'Eucaristie par cualchi mêse e dovarès vênus judât a intivânt dute l'impuartance par la vite da la Glesie. E, prin di dut, e dovarès vênus puartât a considerâle no come une realtât ovie ma come un don prezios. Ancje dutis lis atenzions ch' a son stadis domanda-

L'Eucaristie tant che don

dis par la riprese da lis celebracions a puedin jessi viodudis no come adempiments intrigôs, ancje se necessaris, ma come ocasion par dâ la impuartance che i spiete a la celebracion eucaristiche. Forsi mai come cumò, la celebracion e domande di jessi ben preparade cjapant dentri ancje diviers ministeris (ancje chel dal acet, che su chest si veve insistût plui voltis tai agns passâts, ma che dome cumò al ven atuât par resons di sigurece sanitarie...). Ogni celebracion, ancje di dîs di vore, no dovarès jessi improvisade, ma preparade cu la predisposizion di dut chel ch'al covente, la sielte atente dal formulari (no simpri chel da la domenie..., ma un ch'al corispuindi a lis leturis dal dì o a particulârs situacions vivudis), la sielte dai cjants, il coinvolziment dai diviers ministeris, e v.i.

48. La suspension da lis celebracions e à vût ancje consequencis negativis. Chê plui serie e je il disamôr di tancj fedêi tai confronts da la Messe da la domenie in parochie, personis che a voltis si sintin a puest cu la cussience parcè ch'a scoltin in alternative chê trasmetude par television o sui *social* (preseant ch'è sedi cualchi volte plui curade e interessante – e ancje comude di stâi daûr... – rispjet a chê da la proprie parochie). A son cussì personis che, pûr no vint ostacui di nature sanitarie a partecipâ, no son plui vignudis a Messe la domenie. E di sigûr e mancje in tantis parochiis la presince dai zovins.

Dal moment che la situazion di epidemie e larà indevant a lunc cu lis limitacions inevitabilis par la pussibilitât di lâ a Messe, al è ben che lis parochiis e lis unitâts pastorâls si organizedin pal miôr par permeti la partecipazion a la plui part da lis personis. Bisugnarà in tancj câs modificâ l'orari da lis Messis e aumentâlis, come numar, se pussibil, tignût cont da la capience da lis glesiis e da lis disposizions sanitariis. Chest al pues compuartâ il pericol di ridusi la dimension comunitarie da la celebracion, ma cumò al è sence dubi plui fuart il peri-

**Un don
par ducj**

cul che cualchi fedêl al puedi pierdi il riferiment setemanâl a l'Eucaristie.

49. Une atenzion particulâr e dêf jessi dedicate ai zovins. Si capîs che la preocupazion di tantis parochiis in chest principi dal an pastorâl e je stade chê di ripiâ la celebrazion dai sacraments, in particulâr da la Messe di prime Comunion. Come ch'al dîs il non stes, la Messe di prime Comunion e dovarès jessi no l'uniche ma la prime di une serie infinide di santis Messis par dute la vite dal cristian. No un travuart, duncje, ma il principi da la partecipazion plene a l'Eucaristie cun cadence setemanâl. Se però lis parochiis no fossin in stât di garantî la pussibilitât di partecipâ a la Messe di bande dai zovins (almancul di chê percentuâl che in ogni câs no si ferme a la prime Comunion), al è evident il messaç negatîf trasmetût a lôr e a lis lôr fameis.

Ancje pai zovins

50. Une oportunitât preziose par fâ vignî iniment il valôr da la Messe da la domenie e par dâi valôr a la celebrazion e ven ufierte da la gnove edizion dal Messâl roman. No si trate dome di sostituî un volum invecjât cuntun gnûf. E nancje di dâ abade a lis plui evidentis, ma in fin dai fats trascurabilis, modifichis. Al è invezit un libri liturgjic intune veste rinovade ch'al va prin di dut cognossût in dute la sô ricjece scomençant da la preziose introduzion. Ducj i libris liturgjics publicâts par meti in vore la riforme postconciliâr, e no dome il messâl, no son libris "pronts par doprâju", ma a domandin approfondiment dai criteris che ju àn ispirâts (e in particulâr i *Praenotanda* a proferissin une vore di motîfs di caratar teologjic, celebratîf e pastorâl), cognossince da lis diviersis pussibilitâts di celebrazion, capacitât di sielte dai tescj cun riferiment al contest concret là ch'è à di fâsi la celebrazion. E nancje dîlu la prime robe par cognossi e doprâ i libris liturgjics e je chê di vêju: a devin jessi in ogni parochie.

**Une gnove edizion
dal Messâl roman
e il so ûs in diocesi**

Il gnûf messâl al va duncje cognossût e studiât pri-

me che doprât par la celebrazion. Tignint cont di chest ma ancje che no bisugne creâ confusion tra i fedêi (in particolâr cun riferiment a lis formulis cambiadis), te nestre diocesi si stabilîs, in sintonie cu la decision cjapade cu la unanimitât da la Conference Episcopâl dal "Triveneto", che l'utilizazion da la gnove edizion dal messâl roman e sedi obbligatorie in dutis lis glesiis cu la prime domenie di avent.

51. La jessude da la gnove edizion dal messâl roman e je ocasion par un percors catechetic di cognossince dal sens da la celebrazion eucaristiche e dai siei diviers elements. Ogni parochie e podarà studiâ la maniere miôr par une catechesi su la Messe par adults e zovins. A podaran jessi doprâts in particolâr i sussidis preparâts da la Diocesi: schedis e cualchi video curt (chescj ultins di doprâ a la fin da la celebrazion da la domenie, in maniere che a sedin destinâts a ducj chei ch'a partecipin ogni setemane).

In timp da la celebrazion a podaran jessi dadis in maniere semplice ancje curtis spiegazions, ben preparadis e no improvisadis, ch'a podaran fâ riferiment ai diviers moments da la celebrazion eucaristiche.

52. La formazion liturgjiche, ch'è rivuarde dut il popul di Diu, e à di jessi destinade prin di dut a cui ch'al à un compit dentri da la celebrazion: letôrs, ministris da la Comunione, cjantôrs e diretôrs di coro, ministrants, assegnâts al acet, e v.i. Sence formazion si riscje di stracapî il sens da la celebrazion e di savoltâ la funzion dai diviers elements da la celebrazion stesse. Une celebrazion e à di jessi di fat curade (ancje tai furniments sacris), dignitose, biele, cuntun just ecuilibri, ancje di tims, tra i diviers moments e metint in evidence chei plui impuartants. Une mense che si puedi ricognossi come tâl, un pulpito no plen di plantis, un implant micro-fonic ch'al funzioni, e v.i., come ancje une omelie

**Une catechesi
su la Messe**

**La formazion
liturgjiche par une
"biele" celebrazion**

essenziâl e costrutive, i cjants sielts cun riferiment a la liturgjie celebrade e atents a chê (par esempi, il cjant dal Agnus Dei nol pues durâ di plui di dute da la preiere eucaristiche...), lis leturis ben proclamadis, e v.i., a son aspiets no secundaris e a voltis decisîfs par vivi cun intensitât e costrut une celebrazion.

53. Dut ce ch'al è stât ricuardât fin ca al à sens se orientât a creâ lis condizions par che la celebrazion da la Messe e vierzi al vêr cult spirituâl, a rindi la nestre vite "eucaristiche" e la nestre comunitât "Cuarp di Crist". Une vite personâl buine di ringraciâ pai dons vûts e di diventâ jê stesse don. "*Fasêt chest in memorie di me*": ven a stâi fasêt memorie dal gno consegnâmi cul donâsi a vuestre volte. Une comunitât che, convocade da la Peraule e nudride dal stes Cuarp e dal stes Sanc, e devente Cuarp dal Signôr, un Cuarp unît e animât tai diviers ministeris dal Spirtu Sant.

**Une vite
eucaristiche**

54. Il timp dal *lockdown* al à viodût in diviers câs un gnûf protagonisim da lis fameis tal cjamp da la preiere a cjase. Une preiere, cualchi volte in formis tradizionâls ma simpri inmagant come il rosari, altris voltis in maniere gnove plui leade par esempi a la Peraule di Diu e a l'atualitât, che in chel moment e à sostituît la partecipazion a la liturgjie. Cumò che si pues partecipâ, pûr cun limitazions, a lis celebrazions (e sperant ch'al resti simpri cussì), al sarès pardabon un pecjât pierdi l'esperieence da la preiere in famee. Internet al ufrìs tantis pussibilitâts di struments utii par vivi cheste preiere; ancje la diocesi e lis parochiis a podaran ufrî sussidis. Ma a voltis lis semplicis preieris tradizionâls – il Patri nestri, l'Ave Marie, il Glorie, un Recue, e v.i. -, magari cu la zonte di invocazions curtis proponudis di cualchidun da la famee, a puedin za bastâ par mantignî un vîf rapuart cul Signôr te vite cotidiane. Un rapuart che si pues ricuardâlu ancje cun cualchi segn: un cuadri a sogjet religjôs, une piçule

**La preiere a
cjase e personâl**

statue, une lum, une Bibie vierte.

La stessee robe e vâl ancje a livel personâl, se si vîf di bessôi o cun cualchidun che nol à la stessee fede. Une preiere tradizionâl, une invocazion di un salm, un at di devozion viers une imagjin a judin la nestre vite a jessi sot il voli e la benedizion di Diu.

4. La caritàt

55. La caritàt e je une dimension constitutive da la comunitât cristiane, che si palese intune atenzion concrete pai puars e pai bisognôs. Il timp da la pandemie cu la crisi economiche al domande un impegn particolâr in chest cjamp. Za in timp dal *lockdown* lis comunitâts cristianis da la nestre diocesi a àn savût fâsi dongje a lis personis plui in dificoltàt dal pont di viste uman e economic. Al è stât un sfuarç no di pôc massime par garantî il mangjâ ancje ai "gnûfs" puars: fameis e personis coladis di vuê a doman intun stât di bisogn pal bloc dal lavôr, la fin da lis ativitâts lavorativis (spes definitive), la pierdite no di pôc o ancje totât di redit. I Centris di Scolte, sence preocupâsi da lis tantis limitacions, a àn cirût di mantignî ogni forme buine par jessi cjatâts a facil vie, ancje dome par telefon, par jessi atents a dutis lis situacions vieris e gnovis di puaretât. La Caritas diocesane e putropis parochiâls a àn metût in vore e potenziât diviers servizis come i emporis, lis mensis, i dormitoris (deventâts centris di acet ancje di di).

Viodude la dificoltàt di diviers voluntaris da la Caritas di podê jessi operatîfs par motîfs di salût o ancje dome prudenziâi, si è assistût a un coinvolziment di diviers zovins ch'a àn garantît, par esempi, la consegne a cjase di aliments o di altris robis ch'a coventin a malâts o anzians.

56. Cumò al è impuartant che chest impegn plurim al ledi indevant a ducj i livei da la nestre comunitât diocesane sedi cun struments pensâts biel a pueste par cheste emergjence economiche, come il "Fonts

**L'impegn
caritatîf tal timp
dal isolament**

**No une
"superdeleghe"
a la Caritas**

Scrosoppi" ch'al à il fin di judâ cui che, cause la pandemie, al à pierdût il lavôr o no lu à podût nancje scomençâ, o ancje cul potenziament da lis variis iniziativis za esistentis.

Dut chest però evitant une "superdeleghe" a la rêta Caritas di bande da lis comunitâts parochiâls. Za in tîmp intun ciert mût normai al è facil che la comunitât i fidedi a la Caritas parochiâl e diocesane dut il setôr dal bisugn. In tîmp straordenaris e di aument da lis necessitâts il pericol che la deleghe si potenzi intune "superdeleghe" al è dut fûr che lontan. Al è clâr che la situazion dificile e pretint competence e professionalitât: no si pues improvisâsi responsabii o colaboradôrs dai Centris di Scolte, ni une realtât complesse e articolade come chê costituite dal Fondo Scrosoppi e pues jessi gjestide di cuicusei. Chest nol vûl dî che la comunitât cristiane e vedi di disinteressâsi di dute l'ativitât caritative o di limitâsi dome a judâ a ingrumâ risorsis economicis. La Caritas e je di fat espression da la comunitât parochiâl (o da la unitât pastorâl), ch'è d'êf sintîsi coinvolte ad implen cul interessâsi a chê, cul cjapâ cussience da lis situazions di dificolât (par esempi cognossi lis situazions di crisi da lis impresis dal propri teritori), cul confrontâsi par decidi ce fâ (ancje dentri dal consei pastorâl), cul meti a disposizion personis volonterosis...

57. Soredut al è impuartant che l'atenzion caritative e sedi ample, come ch'è je stade in tîmp dal isolament in diviersis parochiis. Une telefonade, une videoclamade o un messaç in chat a une persone in dificolât, la disponibilîtât a fâ la spese par une persone anziane convicine, la segnalazion discreta e rispietose al Centri di Scolte da la Caritas di situazions platadis di puaretât, e v.i. a son dutis manieris une vore semplicis, ma fundamentâls par vivi une caritât ample. Manieris però ch'a puedin nassi dome di une mentalitât vierte, di voi atents a cui che nus sta intôr, di un cûr ch'al è bon ancjemò comovisi. Carateristichis che ducj o podin domandâ

**Une caritât
ample**

come dons al Signôr par nô e par lis nestrîs fameis.

58. L'atenzion caritative no pues limitâsi ai "nestrîs": in ogni bande dal mont a esistin di simpri i puars. La pandemie a `nd à dome aumentât il numar, zontant altris personis diventadis puaris a milions di oms e feminis ch'a vivin in eterni in miserie par colpe di fam, malatiis, sotsvilup, scjarsetât di risorsis, sfrutament, vueris, injustiziis, disastriis ambientâi. La pandemie stesse e je daûr a colpî d'ûr, cun tantis tantis vitimis, i Paîs dulà che nol esist un bon sisteme sanitari e dulà che di fat al è impussibil meti in vore ancje lis misuris di prevenzion plui semplicis. Al ven spontani di domandâsi: ce podino fâ noaltris, za preocupâts par la nestre situazion? Di sigûr no tant. Par cumò, però, no dismenteâsi di lôr, cirî di jessi dongje almancul cul cûr e cu la preiere ai lôr patiments, partecipâ a chês formis di solidarietât e di aiût promovudis di diviersis realtâts, come par esempi la Caritas stesse e il Centri missionari. La nestre diocesi e pues fâ stât ancjemò su la presince in cualchi paîs di missionaris ch'a colaborin cu lis diocesis e lis Caritas locâls, e e je in relacion za di timp cun diviersis Glesîis sûrs e spes o ospitìn sacerdots mandâts dai lôr vescui pal studi e par un'esperienze pastorâl. Rapuarts prezîôs ch'a podin jessi bogns ancje par palesâ la nestre vicinace in cheste situazion particolâr, ch'è unîs ogni part dal mont.

**No dismenteâsi
dai puars dal mont**

5. I ministeris

59. La Glesie da lis origjinis, cul aiût dal Spirtu Sant, e à savût cjatâ in se stesse plui ministeris, ducj destinâts a fâ cressi il Cuarp di Crist, ch'al è la Glesie stesse, viers la maturitât e la plenece. Lein ce ch'al aferme Pauli inte letare ai Efesins: "*Al è lui [Gjesù Crist] ch'al à destinât un pôcs come apuestui, altris come profetis, altris ancjemò come vanzeliscj, altris come pastôrs e dotôrs, par preparâ i sants al ministeri, par fâ sù il cuarp di Crist fin che*

no rivèn ducj a l'unitât da la fede e da la plene cognossince dal Fi di Diu, fin al om complet, a chel livel di svilup ch'al colme la plenece di Crist. E cussì no sarèn plui fruts sbalotâts e puartâts par ca e par là di ogni bugade di doctrine, imbroiâts di oms esperts tal tiessi dome trainis. Al contrari, vivint la veretât, o fasèn cressi il mont intîr tindint a lui, che al è il cjâf, Crist. Midiant di lui dut il cuarp, disponût in armonie e tignût adun di dutis lis articulacions ch'a sostentin ogni part secont la sô funzion, al cjape fuarce par cressi e par fâsi sù tal amôr. (Efesins, 4,11-16).

L'apuestul al fevele dome di cualchi ministeri, ma il so discors al vâl par ducj i ministeris che si articole la comunitât, valorizant i dons di ognidun e fasint atenzion a la vite concrete.

60. L'esempli plui evident da la nassite di un ministeri su la fonde di un bisugn concret e di un discerniment voidât dal Spirtu Sant al è chel dai "siet" che si fevele tal cjap. 6 dai Ats dai Apuestui. Un ministeri di servizi a lis mensis vignût fûr di une situazion di bisugn o, miôr, di une cierte (forsi ancje in part suponude) trascurance par cui che si cjatave in dificultât (lis veduis di lenghe greghe) ch'è veve creât malcontent inte comunitât di Gjerusalem, ma che po si jere rivelât determinant ancje par l'anunzi e par la testimoniance evangjeli-che (un dai siet, Stieffin, al sarà il prin martar).

Il diaconât, ristabilît inte sô forme "permanent" dal Concili Vatican II, si riferis al ministeri dai siet, ancje se vivût in formis diviersis leadis a la Glesie atuâl. Si trate di un ministeri presint di timp ancje inte nestre diocesi e ch'al cîr ancjemò une sô definizion plui precise. Forsi e je mancjade une necessitât concrete par che si invii. No podaressial jessi che la situazion di emergjence e precarietât di cumò – no dome sanitarie e economiche, ma prin di dut eclesiâl e pastorâl – e domandedi propi une riscuvierte e un recupar di chest ministeri?

**I siet "diacuns"
e i diacons atuâi**

61. L'esperience di chescj agns a nivel di Glesie taliane e no dome, e à ufiert indicazions preziosis a rivuart dal diaconât. In particulâr cuatri. La prime e je che il ministeri dal diaconât al pues cjatâ un so spazi util e reâl te comunitât cristiane plui che si met a un nivel soreparochiâl par un servizi dedicât, ancje cuntune specifiche responsabilitât, tal cjamp caritatîf, catehetic, di pastorâl familiâr o di amministrazion. Il diacun al sarâ inserît, si capîs, intune specifiche comunitât parochiâl e assumarâ ancje la funzion liturgjiche, ma nol sarâ dome o plui di dut chest a definîlu. Un servizi significatîf e continuatîf – e e je une seconde indicazion – al domande disponibilitât di timp: un om che pûr vint fede, sensibilitât eclesiâl, spirt di preiere, atenzion a chei altris, e v.i., ma che il so timp al è cjapât cuasi dal dut dal lavôr o da la famee, dificil ch'al puedi assumi un servizi diaconâl. La tierce e je la necessitât pal diacun di une salde formazion teologjiche, spirituâl e pastorâl sedi in fase di preparazion, sedi po da la formazion permanent: in dì di vuê i compits dal diacun a esizin che nol sedi dome un fedêl di buine volontât, ma ch'al sedi il titolâr di un ministeri impegnatîf e decisîf par la comunitât cristiane. Infin, la cuarte indicazion, ch'è nas da la esperience, e je ch'è di cjatâ un ecuilibri just tra "autocandidature" al diaconât e propueste da la comunitât. Il diaconât si base suntune clamade dal Spirt ch'al interoghe dret la persone. Une clamade, però, ch'è pues jessi mediade da la comunitât cristiane (e di cui che in ch'è al à une responsabilitât) ch'è ricognòs intun om virtûts particulârs, prin di dut une reâl disponibilitât al "servî", ch'a puedin jessi segnâl di une autentiche vocazion al diaconât.

**Cualchi indicazion
par la ricostituzion
dal diaconât**

62. Il recupar auspicabil dal diaconât permanent te nestre diocesi al dêf insuazâsi intune pastorâl da lis vocazions e dai ministeris plui intense. Une pastorâl ch'è partis da la preiere: une preiere no par che altris a fasedin..., ma par che prin di dut jo e cui che mi sta dongje (gno fi, mê fie, gno nevôt, ... si

**Une pastorâl
da lis vocazions
e dai ministeris**

rindedin disponibii a une clamade dal Signôr. Che si base po suntune comunitât vive dulà che tancj cun gjenerositât a vuelin colaborâ ancje in forme stabil tai diviers ministeris, evitant "deleghis" al plevan e ai predis (e dulà che chescj no tindin a concentrâ dut su di se...) e impegnantsi in percors formatîfs. Une comunitât ch'è stime e favorìs lis diviersis vocazions, ancje al presbiteri diocesan (e o dovìn ringraciâ il Signôr parcè che in chescj ultins agns a son zovins da la diocesi che si orientin bande cheste vocazion frequentant il seminari interdiocesan). Une comunitât dulà che si cjape sul seri la disponibilitât al Vanzeli dai fruts, dai adollessents e dai zovins e ur si ufrìs (prin di dut di bande dai predis e dai religjôs e da lis religjosis) un reâl e continuatîf acompagnament tal cressi da la vite cristiane, nol impuarte quale ch'è sedi la lôr vocazion.

La presince a Guriza di cualchi an incà da la Comunitât propedeutiche dal Seminari interdiocesan (frequentade dai zovins ch'a scomencin il percors formatîf dal seminari), l'aiût pastorâl dât dai nes-tris seminariscj in cualchi comunitât parochiâl, la partecipazion, in particolâr dai zovins, ai appuntamenti ch'a segnin il pas dal percors dal seminarist (amission tra i candidâts, ministeri dai letôrs e dai acolits, diaconât) a son dutis occasions preziosis par fâ ricuardâ no dome il valôr da la vocazion presbiterâl, ma ancje chel di ogni vocazion cristiane.

Lis stessis carateristichis ca indicadis par une comunitât a dovaressin jessi ancje in ogni famee cristiane. Timp indaûr, ancje no tant lontan, tantis vocazions a cjatavin te famee un bon teren par nassi e svilupâsi. Chest, ancje se plui di râr, al sucêt ancje in dì di vuê. Une famee dulà che si pree, si scolte la Peraule di Diu, si cîr di vivi il Vanzeli, i si da valôr a la vite come don ancjemò in dì di vuê e pues jessi element a pro di vocazions cristianis orientadis al ministeri, a la consacrazion, al matrimoni, al impegn laicâl tal mont; in ogni câs a un spindi la vite par amôr daûr il disen di Diu.

IL NÛL LUMINÔS

63. Il popul tal desert al jere acompagnât di un nûl, segnâl da la presince di Diu, un nûl che di gnot al diventave une colone di fûc. Un nûl che si metè fra il cjamp dai egjizians, che ur corevin daûr ai ebreos scjampâts dal Egjit, e chel di Israêl, ma «*il nûl al jere scûr penç par un, invezit par chel altri al iluminave la gnot*» (Esodi 14,20). Un nûl ch'al plattave il lûc da la rivelazion di Diu: la mont e la tende da la cunvigne. Un nûl ch'al voidave il popul di Diu traviers dal desert: «*A ogni tape, cuant che il nûl si alçave parsore dal santuari, i fîs di Israêl si metevin in marce. Se il nûl no si alçave, no si metevin in viaç fintant che nol tornave a alçâsi. Parcè che, vie pal dî, il nûl dal Signôr al stave parsore dal santuari e, di gnot, dentri al jere dut une fogule, che le viodevin dute la cjase di Israêl. E cussì par dut il timp dal lôr viaç*» (Esodi 40,36-38). Un nûl ch'al jere ancje une protezion, come ch'al aferme il salm 105 ricuardant la esperience dal Esodi: «*Al à slargjât un nûl par taponâju, e un fûc par iluminâju gnot vie*» (Salm 105,39).

**Il nûl dilunc
il viaç
dal desert**

64. Tai Vanzelis al è un episodi là che i si da grande impuartance al nûl: chel da la trasfigurazion. Tornìn a lei la storie di Mateu: «*Sîs dîs dopo, Gjesù al cjolè cun se Pieri, Jacum e Zuan so fradi e ju menà fûr di man, suntune mont alte. E al comparì davanti di lôr trasfigurât: la sô muse e diventà lussorose come il soreli e lis viestis candidis come la lûs. E ve, ur comparirin Mosè e Elie tal at di fevelâ cun lui. Alore Pieri al cjapà la peraule e al disè: "Signôr, par nô al è biel stâ ca! Se tu vuelis, o fasarai ca trê tendis, une par te, une par Mosè e une par Elie". Biel ch'al jere ancjemò daûr a fevelâ, un nûl luminôs ju involuçà. E ve, dal nûl si sintì une vôs ch'è diseve: "Chel ca al è il Fi gno, l'amât, là che jo o ai metude dute la mê contentece. Scoltâitlu". Sintint cussì, i dissepui a colarin cu la muse par tiere, spaventâts a muart. Ma Gjesù ur le dongje e*

**Il nûl da la
trasfigurazion**

ju tocjà disint: "Jevait sù; no stait a vê pôre!". E lôr, alçant i voi, no vioderin nissun, dome Gjesù» (Mateu 17, 1-8).


Il nûl luminôs al involuce i trê apuestui e ju fâs jentrâ tal misteri di Diu, come che i jere sucedût a Mosè sul Sinai e te tende da la cunvigne. Li a ricevin la rivelazion di Gjesù come il Fi, l'amât, di scoltâ. Lui, di fat, al è Chel che nus manifeste l'amôr dal Pari, che nus palese che ancje nô o sin clamâts a diventâ in Lui fîs par opare dal Spirtu Sant.

Da rest al è il Spirt che, tant che nûl, al invere l'incarnazion dal Fi di Diu tal grim di Marie. Al aferme di fat l'agnul in rispueste a la domande da la Vergjine: *"Il Spirtu Sant al vignarà jù sore di te e la fuarce dal Altissim ti cuvierzarà cu la sô ombre. Cussì chel ch'al nassarà al sarà sant e al sarà clamât Fi di Diu».* (Luche 1,35).

65. In chest moment difcil si sintìn come involuçâts da la fumate, dentri di un nûl. No savìn ben dulà lâ e cemût movisi e se nus sarà permetût di lâ indevant par la nestre strade plui o mancul ben e di trasfigurâ la nestre viodude. E se chel nûl che nus involuce fossial il segnâl da la presince di Diu? da la sô vicinace e da la sô protezion? O domandìn che chel nol resti simpri scûr par nô, ma che in chest timp no facil al puedi diventâ luminôs. Tal episodi da la Sense un nûl al sotrai dai voi dai dissepui Gjesù ch'al va sù in cîl (cfr. Ats 1,9). Ma Lui nol è sparît dentri dal nûl parcè ch'al è cun nô ducj i dîs fint a la fin dal mont (cfr. Mateu 28,20). Chest nus colme di lûs, di sperance e di gaudie. A dispïet di dut.

Involuçâts da la fumate o di un nûl luminôs?

Santissim Non di Marie
Guriza, ai 12 di Setembar dal 2020



arcivescuv

TABELE

Une letare pastorâl par un timp di instabilitât	3
Desert, esili e tornâ dal esili: dicerni il nestri timp scomençant da la Peraule di Diu	5
1. Il desert: un timp di prove	6
2. L'esili: esperience da la pierdite.....	10
3. Il tornâ e la dificile ricostruzion.....	15
Une leture gnove "sapienziâl"	19
Une comunitât cristiane vive tal timp da la pandemie.....	26
Vivi vuê come Glesie dai apuestui	30
1. Il primât da la Peraule	30
2. La catechesi e l'iniziazion cristiane	33
3. L'Eucaristie, la liturgjie e la preiere	36
4. La caritât	41
5. I ministeris	43
Il nûl luminôs	47

**CUALCHI INDICAZION PAR LIS COMUNITÂTS
SUGJERIDIS DA LA LETARE PASTORÂL
"IL NÛL LUMINÔS"**

1. Une leture gnove "sapienziâl" dal timp dal *lockdown* e ancje dal atuâl gnûf inizi, daûr da lis esperiencis dal popul di Diu (desert, esili, tornâ). In particolâr di bande dai conseis pastorâi parochiâi o di unitât pastorâl, di meti in pratiche dentri da la fin di Novembar (nn.21-25).
2. La gnove edizion o l'inzornament dai "Ats da la comunitât", di meti in pratiche dentri di Pasche, cun riferiment ai diviers elements da la Glesie (Peraule-catechesi, liturgjie, caritât, ministeris), viodûts su la fonde dal moment atuâl e individuand i piçui pas concrets (n.35).
3. Trê incuintris di formazion pai membris dai conseis pastorâi su catechesi, liturgjie e caritât (n.35).
4. Tornâ a fâ la visite pastorâl te modalitât "cuotidiane" (n.34).
5. La continuazion da l'esperience dai Grups da la Peraule (n.39).
6. La preparazion e la difusion dal "Calendari da la Peraule" (n.39).
7. La formazion par l'utilizazion dai *social* (n.37).
8. L'acompagnament prime e dopo dal batisim (n.43).
9. Il sostegn ai adults che si preparin a ricevi il batisim e la cresime (n.44-45).
10. La verifiche dal orari da lis Messis par permeti la partecipazion di ducj (ancje i fruts) (nn.48-49).
11. La catechesi su la Messe e la formazion liturgjiche in ocasion da la jessude dal gnûf messâl (nn.51-52).
12. Doprâ il gnûf messâl cu la prime domenie di avent (n.50).
13. Il Fonts Scrosoppi (n.56).
14. L'atenzion caritative ample (n.57).
15. L'aiût ai paîs plui puars (n.58).
16. La ricostituzion dal diaconât permanent (n.60-61).
17. La pastorâl da lis vocazions (n.62)